

東
華
續
錄

東華續錄

同治十

臣主先謙敬編

臣張式恭恭校

六月壬子朔諭內閣前因御史文吉奏請嚴定外任官員失察僚屬貪劣處分一摺當交吏部議奏茲據該部查照定例奏請嚴定章程等語定例督撫貪婪向准互相糾參如不行糾參罪應降調藩臬等官獨予免議用意至爲深厚今該御史牽引樂斌等劣款本省藩臬何以徇隱不言是責成藩臬糾察督撫恐開攻訐挾制之風著毋庸議州縣犯有貪婪款蹟經督撫先行奏參司道分別同城不同城予以降畱罰俸處分如款蹟發覺不由司道揭報者司道徇庇例議處知府直隸州知州貪婪司道不揭亦照知府不揭州縣例處分舊例本極精嚴可毋庸再行分別嚴定處分用

特申諭各直省督撫惟當力挽頽風所有大小官員一切陋規認真裁革遇有屬員貪劣事發必須破除情面隨時劾參府州司道有徇庇貪婪等弊亦責成督撫據實參奏見在封疆大吏正己率屬者固不乏人而狃於積習徇情瞻顧者亦復不少遇有貪劣屬員或經科道糾參或經部民京控凡交查訊辦之案往往將重大情節彌縫洗刷惟挾摘一二小疵予以議處轉使劣員得以避重就輕曲爲保護習套相沿實堪痛恨嗣後直省督撫如有查辦交訊之案爲屬員開脫僅予空參者若日久敗露或別經審實督撫照徇庇例從嚴加等議處若屬員犯有枉法濫刑橫徵苛斂及侵吞捐項棄城不守種種罪狀而督撫爲之開脫者非身有疵瑕處人指摘卽受其賄賂甘與通同亦必將督撫治罪將此通諭知之

○諭前因耆齡前赴福建辦理援浙軍務節節耽延降旨將該撫

交部議處茲據吏部奏稱廣東巡撫耆齡時逾數月始報起程嗣復在清遠逗遛應照任意耽延降一級調用例上加等議以降二級調用毋庸查級議抵等語耆齡著加恩改爲革職畱任若再玩延定當從嚴懲處○癸丑諭內閣前因蔣琦齡奏請開屯田以恤旗僕等語當交八旗都統會同該部議奏茲據戶部會議覆奏並請飭吉林等處將軍都統府尹等將指查各件迅速覆奏一摺國家定鼎燕都旗兵生齒日繁丁雖增而兵額有定不能因之加廣自應開墾閒田豫籌移屯以資生計道光元年吉林將軍富俊奏辦雙城堡屯田移居京旗閒散除陸續移居給田屯種外餘田尙多上年惇親王奏請籌議八旗開墾生理經戶部奏請飭令吉林將軍查明前項餘地可否推廣耕種及房屋牛具等項有無經費據實奏明曾經允行在案迄今未據該將軍覆奏實屬任意顛預

著景綸卽行查明迅速具奏並著特普欽玉明和潤景霖將該部議覆悖親王原奏並蔣琦齡此次所稱東三省沃壤數千里可否移居八旗散丁關東口外等處有無閒田可否移屯及旗民之贖產人官之籍產可否授田各條詳細查勘認真籌畫速行覆奏務使事在可行以期經久至蔣琦齡所稱獨石口外之紅城子開平張家口外之興和新平等四城及熱河等處之閒田與旗民贖產入官籍產可否開墾若干頃足資安插若干戶及房屋籽種牛具等項應如何籌畫經費並酌定章程之處均著春佑慶昫並總管內務府大臣逐細詳查據實具奏毋許草率了事○甲寅諭內閣遮克敦布等奏勦辦曹南捻匪殲除首要各犯河北肅清一摺捻首石三隴勾結南捻北犯經遮克敦布等會同僧格林沁所派馬隊勦撫兼施甫經完竣另捻焦桂涓等糾眾北來石三隴之兄石

二隴乘機勾結劉清和邊啟沅等意圖接應總兵伊綿阿等督飭兵分路堵剿殺賊無算生擒擒首劉清和一名其石二隴等十二名亦經濮州知州范允中全數拏獲分別正法焦桂涓一股勢已窮蹙就近赴曹州乞降辦理尙屬妥速仍著飭令在防文武將邊啟沅一股悉數兜拏毋任漏網所有出力員弁准遮克敦布等會同文煜譚廷襄擇尤保奏○諭議政王軍機大臣等前因僧格林沁等奏匪首董執信等被剿窮蹙率眾投誠當經諭令該大臣妥爲安插復據譚廷襄奏會匪焦桂涓等竄至馬集被團練擊敗卽赴曹郡乞降經譚廷襄將該匪等解往僧格林沁軍營覈辦茲據遮克敦布等奏擒首焦桂涓等帶領馬步千餘人北來焚掠因劉清和石二隴等被官軍擒獲探知河北已無接應其勢益孤遂就近赴曹州乞降一摺並將焦桂涓偽示供詞一併鈔錄呈覽曹

屬會匪焦桂涓等勾結皖捻李城等意圖北竄前經僧格林沁馳奏嚴與該逆供詞實相脗合見雖窮蹙乞降察其狼子野心斷難馴順且有與董執信李標等面商再舉之語是董執信等名爲就撫其實心存叵測若不及早剪除必貽後患焦桂涓業已解赴僧格林沁軍營著該大臣提同董執信李標等三犯卽行正法其股首及千長百長類皆桀驁不馴並著僧格林沁嚴密查察如仍怙惡不悛著一併明正典刑毋稍寬縱該逆既有求南捻趙浩然等北來並與劉前等豎旗北犯之供仍著僧格林沁譚廷襄豫爲防範毋任竄越遮克敦布另摺奏北路雖漸肅清門戶仍須嚴防若烏兵勇分駐曹郡則館濩一帶兵力愈形單薄且隔越黃河聲勢亦不能聯絡等語自係實在情形遮克敦布著毋庸分駐曹郡如該郡有警仍著該副都統星馳往援毋許稍分畛域其邊啟沅一

股並著該副都統嚴飭直東文武購綾嚴拏勿任漏網焦桂涓僞示供詞均著鈔給僧格林沁譚廷襄閱看將此由六百里諭令知之○飭陝西撥解銀兩備烏什經費○乙卯諭議政王軍機大臣等前據曾國藩等奏官軍進逼金陵因兵數不敷分布俟增調多隆阿等軍到防再籌大舉等語當經諭令該大臣必須慎益加慎不可輕易進攻因思鮑超一軍進取甯國約計以一萬之師抵禦二十萬之賊所部兵勇不免單薄且前據奏該提督平日馭將過嚴將士有渙散之意頓兵堅城日久不無可慮著該大臣密飭該提督於勇往之中仍須加意慎重甯國廣德爲蘇常門戶賊以全力死守若官軍奮勇進攻傷亡必眾鮑超營內應否必須添兵協助方可萬全之處著曾國藩迅速妥籌辦理如須添兵以何路之兵爲最宜卽著酌量調派毋失機宜見在竄赴澠池之賊楊飛熊

迎勦受傷該逆有圖踞洛陽之說已飭勝保督兵赴豫馳赴洛城
所有苗沛霖練眾責成李續宜相機辦理金陵攻勦正緊多隆阿
爲陝省牽掣恐不能剋期馳抵金陵金陵未能卽克苗練一事似
應暫示羈縻事有緩急而勢亦出於不得已並非朝廷本意勝保
去後苗練失所依傍若能從此馴順李續宜自可駐軍廬郡鎮撫
多隆阿畱防之飛虎十營該大臣如需調赴卽著酌辦有人奏苗
沛霖李世忠所克復城池皆伊踞守與陷於賊中無異苗沛霖叛
迹昭彰李世忠尙無反側但須駕馭有方始可戢其驕恣等語李
世忠一軍前已諭令歸曾國藩節制朝廷具有深意諒該大臣必
能妥爲駕馭使該提督就我範圍也原片鈔給閱看將此由六百
里密諭知之○諭瑛棨奏陝省軍情緊要援師次第雲集請簡派
大臣總統全軍以歸節制並漢回互關禁殺甚慘請就近酌派勝

保趕緊來陝各摺片又據鄭元善奏陝省竄匪窺擾河洛擬調各路兵勇親率西行相機援應並歷陳廖慶謀戰功疊請檄調來營差委各摺片覽奏均悉前因陝省軍情喫緊簡派多隆阿督辦陝西軍務諭令該將軍督率將領由豫省沿河西上原期馳赴潼關藉資鎮撫兼可迎剿東竄賊匪保全晉豫地方嗣因多隆阿一軍須由六安繞赴襄陽入陝復經諭令該將軍探明道路迅速進行毋庸紆道楚省見在陝南竄匪既未剿除而漢回仇殺情形日甚一日亟須該將軍入關剿辦著多隆阿迅催雷正綰等遄行入陝毋得稍事遷延見在渭河南北各州縣漢回互相殘殺回匪馬隊日增已延及附省之十餘里地方多隆阿大兵到後固須懾以兵威仍須推尋其肇釁之由持平辦理釋其仇怨方能迎刃而解漢回構釁非如髮逆之可以剿殺了事雲南之事亦由於辦理偏

袒貽禍至今多隆阿饒有智謀惟於陝省地勢民情究未熟悉著
卽會同瑛榮吳振械等妥籌辦法斷不可輕聽本地紳士之言致
令有所偏倚該將軍督辦全省軍務責任固重營務亦繁必須得
一二明幹文員幫同籌辦著官文於屬員中擇其才識諳練曉暢
戎機者如道員金國琛等簡派一二員交多隆阿軍營以資襄助
其竄至澠池一帶之賊有圖占洛郡窺伺汴梁之說已諭令勝保
馳赴洛陽督兵剿洗鄭元善業將汝光防剿事宜責成張曜等妥
辦著卽回省布置以顧根本前據僧格林沁奏金樓賊匪勢已窮
蹙計不日卽可竣事是以諭令毋庸分兵前赴洛陽見在由陝回
豫之賊意圖侵軼洛中東偏省會鄭元善以關繫豫省全局商請
僧格林沁抽撥馬隊千名飛咨毛昶熙酌派遊擊敖天印帶隊來
援僧格林沁定能先其所急如數調撥僧格林沁所派各隊到齊

後卽著鄭元善會合勝保各軍將此股竄匪迅速殲除毋令蔓延
貽患豫省官軍接仗失利賊勢益張見在盤旋於新澠之交去晉
疆均不甚遠仍著英桂督率在防文武會同成明所帶京兵嚴密
守禦毋稍鬆懈已革知府廖慶謀旣據鄭元善奏稱該員辦事認
眞勇往直前著准其檄調來營差遣其被參各款仍著確切訊究
毋稍瞻徇見在陝省援兵次第雲集瑛榮當就見有兵力會同馬
德昭孔廣順等相機調遣剿撫兼施漢回皆地方百姓卽地方官
應辦之事瑛榮不得專待簡派大臣致滋貽誤瑛榮請飭勝保赴
陝因豫省軍情緊要必須勝保移兵前往多隆阿計日卽可抵陝
是以仍令督辦陝省軍務以期事權歸一至信陽一帶踞匪前經
官文派歐陽正塘越境攻剿著官文嚴飭該員會同豫省兵勇合
力兜剿以期及早廓清將此由六百里各諭令知之○諭鄭元善

奏陝省竄出粵匪窺擾河洛副將楊飛熊接仗失利該逆仍盤踞新澠之交又探聞前出盧氏竄回皖境股匪出閒道疾馳西上爲句援竄突之計設竟侵軼洛中勢將不可收拾已咨商僧格林沁抽撥馬隊千名並咨毛昶熙酌派遊擊敖天印勇丁星馳會剿該撫已帶隊赴省請飭勝保統兵進紮河洛督剿各等語前因陝省軍情緊要曾諭勝保將苗練一事辦理就緒卽移軍而西進紮河洛惟其時河洛一帶尙有楊飛熊可以堵截該大臣尙可無須離皖乃見在回竄粵匪勢甚猖獗楊飛熊一軍業已挫敗鄭元善帶兵前赴省城亦止能顧及會垣設該逆占踞河洛圖竄省城則豫省完善之區必遭蹂躪皖北本係殘破之區苗沛霖自加恩免罪後剋期以挫張落刑爲立功地步是皖省情形較之豫省緩急大相懸殊勝保前奏有親統馬步五千名前赴沈項督剿之語著卽

星夜兼程前進走河洛督軍勦辦回竄陝匪黨賊眾兵單卽將該大臣畱皖各軍一併調往以厚兵力鄭元善取道省城前赴河洛並著會商進剿以保完善之區李續宜身任皖撫責無旁貸勝保起程後所有淮北剿捻各事宜卽著妥爲調度苗沛霖係皖省練總自當聽巡撫約束若能安分守已建立殊勲非獨李續宜必能奏請獎敘卽皖省人心亦無異言卽其跋扈鴟張在李續宜固不准寬假卽勝保亦豈能優容見已許其免罪將來之禍福悉由苗沛霖自取李續宜當通籌順逆不得稍存成見務當肅清淮北悉復舊制方不負委任之意豫省軍情正值喫緊勝保於接奉此旨後迅速起程母得以皖事未了稍涉遲緩李續宜卽札飭淮北各營悉歸節制不准以淮北軍務勝保任之意存推諉也將此由六百里各諭令知之○諭慶端奏溫州松陽剿賊獲勝及查明臺

灣會匪滋事情形各摺片據稱竄擾瑞安之賊分踞桐嶺等處經官軍連日剿擊斃匪多名等語該匪歸併青田計圖窺犯閩疆著慶端督飭秦如虎等迅速進剿毋令闖入其松陽踞逆負嵎抗拒經林文察等督軍屢擣賊壘正在得手卽著飭令該總兵等迅圖攻克毋任久踞臺灣會匪占踞縣城分股肆擾前據徐宗幹奏該匪尙踞彰化業經諭令飛飭曾玉明仍赴泉州統兵前往剿辦茲據奏稱林向榮等聯絡泉莊軍威已振著慶端卽咨商徐宗幹調度策應迅殄羣醜規復縣城以靖海疆本日慶端奏參派兵不慎之副將石棟等業照所請分別摘頂革職惟此項提標兵一千名何以秦如虎統領剿辦平陽賊匪卽所向有功迨經張啟煊調派則紛紛潰散慶端但歸咎於石棟等挑派不慎並未將張啟煊劾參是但治其末而不能治其本恐無以服將士之心仍著慶端將

此次弁兵潰散是否由於張啟煊不善調遣之處查明一併參辦
毋許姑容將此由五百里諭令知之○丙辰諭內閣僧格林沁奏
追剿匪首獲勝將詐降匪徒全行正法並收拾捻圩剿辦棍匪獲
勝各情形一摺山東長槍會匪焦桂涓等竊曹屬意在糾合董
執信等四出滋擾經僧格林沁派營總恒齡等帶隊在陽家集截
剿斃匪多名該匪率眾投降旋據起獲焦桂涓所帶偽示並所具
供詞均極悖逆卽經僧格林沁札飭兗沂道盧朝安等將焦桂涓
王貫一併爲從之千百長等匪焦桂涓母妻兩子一併就地正法
實足申國憲而快人心其夏邑東南之太邱等賊圩經營總富和
攻克永城西南之雙橋集捻圩經營總永林收復棍捻各匪亦經
德楞額哈勒洪阿督隊剿擊先後攻克卓山砦從山圩賊巢生擒
匪徒陳雨來等正法逃竄之匪復經官軍追殺殆盡將賊圩一律

焚毀辦理均尙得手著僧格林沁督飭帶兵各員乘機進攻盡殲醜類毋畱餘孽○僧格林沁毛昶熙奏金樓賊圩經官軍屢次進攻守禦甚嚴訊據逃出民人供稱賊中頭目尤本立常立身最爲兇悍金鳴亭卽姚氏等結成死黨舍命抗拒臣等審度情形設法離開乃出示諭令投誠免死旋有金鳴亭遣人潛遞稟詞欲率匪眾投誠當卽密諭該逆設法擒獻首逆多日未見投出復經訪得金鳴亭之子金綏駒及其家口避居金樓東南二十餘里之郭老家寨內拏獲到營而金鳴亭仍復不出嗣後賊中糧漸缺乏投出男婦多人適有常立身夥黨出降因令將金鳴亭前遞稟詞帶給常立身閱看該逆遂將金鳴亭殺害藉此除一巨惡自五月十五日後各營疊次進攻仍未得手三十日臣僧格林沁派國瑞帶領翼長全順蘇克金等督催各營兵勇合力進攻臣毛昶熙亦派知

府尹耕雲等帶隊助剿遊擊許得等帶領投誠勇隊首先攻入賊勢大亂當將匪首邵姚氏及其兩子並尤本立常立身楊玉聰等一併殺戮斃賊七八百名餘匪搜殺淨盡立將賊寨平毀至亳州迤北界溝營郭集等處有李廷彥楊懋汰宋濬沅等股匪滋擾漸次北犯意在接應金樓臣僧格林沁派恆齡等帶領馬隊臣毛昶熙添派練勇會同進剿該逆旋即南竄十七日追至那家圩斃賊多名餘匪乘夜遠遁二十六日該營總等帶隊直抵亳州以安民心臣僧格林沁亦即日移營夏邑相機剿辦僧格林沁又奏查董執信李標自投誠後尙知感荷 皇仁臣詢以賊匪情形並無隱諱應令隨營效力贖罪仍隨時察看儻首鼠兩端再行辦理惟竄擒匪焦桂淐等竄回曹屬前經臣商之國瑞揀派營總恆齡等在楊家集截剿斃賊多名其脅從之匪紛紛逃散勢更窮蹙該逆

首帶百餘人赴曹州府投誠經知府林士琦等先將夥黨分別遣散旋據恆齡等帶隊回營將起獲焦桂淂所帶僞示呈驗查該逆因被勦勢窮始行投誠且僞示詞意甚屬悖逆情節較重未便姑容當將逆首焦桂淂王貫一併爲從之千百長等匪及焦桂淂家屬一併就地正法以絕根株至前派駐紮永夏之營總富和疊攻夏邑東南之太邱賊圩未能得手嗣於五月十八日探報逆首張落刑在鞠家集裝旗馬步賊匪二千餘名均交趙浩然帶領欲接太邱賊匪南竄見已潛入寨內樊家集擒匪亦入太邱會合十九日富和帶領全隊設伏樊家集附近起更時分該逆馬步賊匪一齊擁出我軍待其行近伏兵鈔擊該逆踉蹌敗走斃賊二百餘名生擒四五百名立予駢誅敗匪薙髮逃散甚多太邱樊家集漢道曰三寨被偪畱髮者數百名隨即歸正二十四日富和移紮漢道

口次日進攻四村集賊圩該逆王廣繼等率領馬步賊匪出圩抗
拒經我軍擊敗賊匪進寨避匿不出應俟大軍會合再當相機進
剿又永城西南之雙橋集爲捻逆郝八等占踞營總永林帶隊往
攻密約寨首王立正等內應立將該匪屠殺殆盡隨將雙橋集收
復 上諭議政王軍機大臣等偕格林沁等奏官軍攻克金樓賊
寨並派隊赴亳州迤北剿捻獲勝一摺金樓踞匪與蒙亳捻巢相
爲犄角經該大臣盡力殄除不留餘孽實足以寒賊膽而申天討
亳州一帶捻圩尙多前派營總恆齡等在亳州迤北剿賊獲勝該
大臣已添兵助剿即可乘此聲威剿撫兼施以期節節收復偕格
林沁另摺奏匪首焦桂淂勢窮乞降帶有僞示詞甚悖逆已全行
正法等語焦桂淂意存叵測自應明正典刑以昭炯戒昨諭將董
執信等三犯一併正法原因其狡詐性成仍恐句結爲患旣據該

大臣奏董執信李標投誠以後尙知感奮著暫緩正法令其隨營效力並隨時察看如其心懷疑貳首鼠兩端仍卽於軍營正法前據譚廷襄奏焦桂涓與劉前同竄曹考之輒廟集焦桂涓見已正法劉前是否亦解往該大臣軍營著一併查明具奏該大臣於各路降眾尙未濫收頗知慎重此後兵威益壯聞風歸誠者必不乏人務須慎益加慎免致將來尾大不掉是爲至要德楞額等仍飭令將未克各圩砦次第克復毋稍疏懈將此由六百里諭令知之○諭田在田奏督隊襲攻奶奶山寨將徧境東北擒匪偪回老巢並攻克殷趙兩圩各摺片黑旗擒股復撲徧城經官軍密購奶奶山賊寨內應將南上寨房屋延燒殆盡其繞赴徧城東北之山套各路股匪亦經田在田分飭兵勇將圍攻劉莊等處賊匪擊退僅李城一股直撲符離大營亦經官軍擊敗又靈壁縣境擒首張逢

科占踞殷趙兩圩亦經兵勇攻克此時黑旗大股業已偪回老巢
殷趙兩圩攻克後靈壁捻股亦可無虞句結惟黑旗捻數過多賊
巢無糧仍恐復出肆擾見在二麥已收該匪野無所掠但使各處
民圩齊心固守官兵隨時應援該匪糧盡勢窮自將紛紛潰散著
田在田激勵民團嚴密守禦並整飭兵勇隨時援應毋稍疏懈其
奶奶山寨踞匪著迅籌攻拔及早殲除無畱餘孽本日據僧格林
沁奏金樓賊圩業已攻克即可進攻毫捻老巢此時黑旗捻股勢
已窮蹙田在田正宜速籌進攻與僧格林沁分路齊進俾該逆不
能互相應援以期一鼓殲除前因宿州軍情喫緊諭令袁甲三撥
兵助剿著袁甲三卽飭派出之將領會合田在田迅速進攻儻兵
力仍形單弱袁甲三並宜酌量增添或另籌一軍由南路進擣該
捻老巢以期兩面夾擊及時掃蕩將此由六百里各諭令知之○

丁巳袁甲三奏原任安徽布政使李孟羣於咸豐九年二月間在廬郡所屬之長城地方陣亡或云力竭陣亡或云不屈遇害傳聞異辭不足以昭垂後世臣於廬郡復後卽飭委員查訪李孟羣死事情形已得大概查李孟羣於咸豐八年夏間帶兵至廬郡之店埠正值軍情緊急福濟因病乞假李孟羣接署巡撫事務未十日而廬郡告陷革職畱營紮營長城爲規復廬郡之計因係獲咎卸事之員呼應不靈兵勇五千半載之久得餉不及兩萬李孟羣力守險要屢次截擊竄賊均能獲勝九年二月陳玉城糾合大股圍攻長城營盤李孟羣以飢卒數千當悍賊六七萬固守十餘日糧盡援絕十五日軍火俱無賊攻愈急參將潘羅成等八員死之十六日營陷李孟羣自率親隨拌命格鬪手刃悍賊數名力漸不支受傷被執其文案親隨員弁州同張湘甲等以身殉者二十員名

該藩司被執後厲聲罵賊被賊擁入廬城數日不食罵不稍輟遂被害於廬州西門內賊中被脅之眾有稍知大義者將該藩司就地掩埋前已購綫尋獲遺骸檢得親筆絕命詞四章確有可憑近城父老縷述李孟羣當日罵賊受刃情狀至今尙有流涕而道者是其臨難不屈大節凜然足爲人倫表式既經查明實蹟應請旨交國史館纂入列傳並准於廬州府死事地方建立專祠其任內一切處分悉予開復至隨同該故藩司陣亡者二十八員名開單恭呈 御覽仰懇 天恩飭部均照陣亡例分別議卹一併附祀再據李孟羣之堂兄知縣李孟奎呈稱李孟羣之父湖北按察使李卿穀在武昌省城殉難已荷恩卹於武昌專祠外准於原籍固始縣自建專祠請將李孟羣及隨同死難各員一併從祀並懇俯如所請以酬忠益 上諭內閣前因勝保翁同書奏稱已革安徽

布政使李孟羣陣亡當經奉 旨將李孟羣開復原官照布政使陣亡例議卹茲據袁甲三奏查明李孟羣死事實蹟懇恩建祠開復處分並將隨同死難各員開單請卹一摺李孟羣轉戰廣西湖南湖北安徽等省忠勇性成功績懋著茲覽其死事詳細情形被害尤爲慘烈孤忠可憫大節無虧允宜渥沛恩施以光泉壤李孟羣著照巡撫陣亡例從優議卹任內一切處分悉予開復其死事實蹟著國史館纂入列傳並准於廬州府死事地方建祠伊父李卿穀原籍固始縣專祠並准將李孟羣從祀以示篤念忠烈有加無已至意○諭議政王軍機大臣等馮子材等奏提督李世忠派參將黃承恩帶兵於龍潭石埠橋分紮營盤僞忠王之子黃老虎等帶賊圍撲東陽營壘分股直逼龍潭勢甚危急經馮子材等派總兵文龍德等帶隊往援行至倉頭地方遇賊鏖戰遙見賊氛綿

巨懸軍深入恐有疏虞遂卽收隊回鎮旋據探稱龍潭官兵營盤業已撤隊全回六合南岸賊援麕集等語前據袁甲三奏李世忠一軍乘閒渡江奪回南岸石埠橋龍潭東洋等要隘分紮營盤爲進偏金陵之計當經諭令馮子材等遏截丹陽等處援匪原恐李世忠之軍深入重地稍有挫失本日據馮子材等所奏情形自係賊匪悉眾爭奪要隘六合援軍未到馮子材派去之軍又中途折回是以龍潭營盤相機撤退但未知曾否接仗失利抑係悉眾自行撤回著留國藩袁甲三查明確實情形具奏其石橋埠東洋之軍是否一併撤退並著查明奏聞以慰廑念見在上游各軍困偏金陵王明山等師船剋日下駛當可會合李世忠一軍將九洲洲克復然後以全力進取方有把握此時功在垂成務須嚴飭各帶兵將弁步步爲營站穩一步再進一步斷不可輕進貪功稍有挫

失諒曾國藩等成算在胃必能通籌全局剋日奏功也如上游各軍會攻九洑洲等處都興阿馮子材等務卽督飭各軍相爲策應不得意存歧視致有疏虞文龍德等赴援之軍是否藉詞折回儻有見賊畏憊救援不力情事著馮子材據實查參毋涉徇隱前據都興阿奏克復江心洲等處該處距九洑洲若干遠近見在有無官兵駐守著都興阿查明具奏本日據給事中吳焯奏太平府屬之官圩甯國府屬之金寶圩有田數萬頃該處民人至今堅守請飭鮑超以攻甯國之軍兼顧二圩我軍亦可資以得食等語著曾國藩察度情形飭令妥辦原摺著鈔給曾國藩閱看將此由六百里加緊各諭令知之○予江蘇陣亡遊擊林定海安徽陣亡參將潘羅成等祭葬世職○戊午諭內閣據大學士會同刑部具奏已革兩江總督何桂清當丹陽失守大營再潰之時輒先託詞退避

爲合省逃官之倡抵蘇後經前巡撫徐有壬勸令紮營無錫不從其議旋聞常州失利又以照料糧臺爲詞徑退常熟迨蘇州失守之前一日又以扼守江海要區爲詞退避上海以致蘇常松太相繼淪陷貽誤地方情罪較重應擬以斬立決罪名請旨等語何桂清身膺總督重任輒敢棄城逃避致令全局潰敗實屬罪無可追惟朝廷明慎用刑何桂清曾任一品大員自當眾議僉同方足以申國憲而昭公允著大學士六部九卿翰詹科道將何桂清各供並給事中郭祥瑞謝增等各摺再行公同會議定擬具奏○諭刑部奏據何桂清呈出司道公稟請飭查辦等語何桂清棄城逃遁罪名業經大學士會同刑部審擬具奏惟據片稱該革員呈出司道公稟一件係前任江蘇按察使查文經前任江甯布政使薛煥江南鹽巡道英祿江安糧道王朝綸於丹陽失守後聯銜稟請何

桂清退守蘇州各情該司道等均有地方之責當常州危急時應如何幫同竭力守禦乃聯銜稟請退守蘇州顯係見事危急意在同逃徐有壬原參摺內亦有何桂清率領地方官退避之語若不從嚴查辦何以肅軍律而飭官方著曾國藩李鴻章將該司道當時如何聯銜具稟及如何退避各情形據實查明具奏其蘇常等處各逃官一併查明參辦殉難各員並著查請議卹以示勸懲○諭前因陝省軍情喫緊命多隆阿督辦陝西軍務原期肅清關陝屏蔽中原茲據都興阿奏淮南地勢極寬收復匪易惟資多隆阿一軍居中重鎮聯絡聲勢若陝西情形稍鬆擬請暫畱多隆阿幫同曾國藩督辦江皖軍務等語所奏不爲無見多隆阿調赴陝西原係朝廷移緩就急不得已之舉見在漢回仇釁已深必須懾以兵威抑其桀驁不馴之氣方可漸就範圍仍著多隆阿嚴催雷正

紹等星馳前進剋日抵陝其多隆阿所統後起各營如能趕緊馳赴秦中將漢回事宜迅速辦竣仍督率所部出關會同曾國荃等圍偏金陵共圖克復方不至顧此失彼若多隆阿全軍日久爲陝西牽掣致江淮一帶少此勁旅亦屬非計仍著官文等統籌全局陝省剿辦事宜若責成雷正綰會同瑛棨籌辦即可成功卽催令雷正綰一軍前往多隆阿卽可督率後起各營駐紮適中之地爲江淮各路屏蔽毋庸遽行入陝似於全局尤有裨益其是否可行及應於何地駐紮之處著官文曾國藩多隆阿妥速相機會商具奏另片奏杭州駐防馬甲金全乍浦駐防前鋒元能等均因城陷受傷繞道來揚求賞差使等語馬甲金全等九名著准其歸併江甯駐防交部興阿畱營差委嗣後如再有被難陸續來揚者著准其照章辦理仍著都興阿彙案奏明以備查覈本日有人奏署准

揚鎮總兵龔耀綸縱勇劫掠請立予革職治罪等語著曾國藩將所參各節確切查明如果有冒功縱寇肆掠殃民等情卽著從嚴參辦原摺著鈔給閱看將此由六百里加緊各諭令知之○予四川陣亡未入流馬楚材等祭葬世職建祠○己未諭內閣袁甲三奏官軍進剿靈壁宿州竄捻收復張家橋等處賊圩等語捻逆分股竄突靈壁宿州一帶經袁甲三派令記名總兵吳秀副都統克蒙額善慶督帶馬隊直趨靈壁會同李世忠派出之參將李丕焯等進逼賊圩卽將捻首王洪田獻出官軍乘勝追剿至張家橋地方該逆紛紛敗竄復經吳秀等跟蹤追剿直抵宿境沿途擒斬二百餘名餘匪奔竄當將就近各圩收復著卽乘勝進攻務將各股捻匪一律廓清其追賊陣亡之參將李丕焯著袁甲三查明請卹○諭譚廷襄奏攻克水寨等處賊巢並剿擊敎匪情形一摺據稱

水寨賊匪程四虎勾結林家洞等寨匪互相犄角經官軍奮力攻
破其滕縣進剿幅匪頗有斬擒嶧縣教匪經德楞額等疊次進仗
亦頗得手等語水寨賊匪雖經官軍將賊巢攻克而匪首程四虎
尙未擒獲且沂州一路匪圍林立著譚廷襄仍飭緒綸等節節進
攻毋任遷就滕嶧等處幅匪並著設法剿辦毋致顧此失彼其招
撫岳相林一節著咨扎隆武等妥速辦理毋許草率了事其在逃
之劉前一犯仍著飭屬跟蹤查拏毋任爲患他處又有人奏鄒縣
曲阜等處教匪請飭德楞額會合扎隆武等併力進攻等語本日
據譚廷襄奏稱德楞額一軍進剿蘭邳交界賊匪追擊殆盡該處
情形稍鬆卽著僧格林沁譚廷襄責成該副都統就近會合扎隆
武趙康侯將該處教匪痛加剿辦務盡根株儻該副都統等坐失
機宜遷延貽誤卽著僧格林沁嚴參並毋任招撫致貽後患將此

由五百里諭令知之○袁甲三奏查苗沛霖之宜剿不宜撫盡人皆知臣身爲統帥豈有姑容之理祇以連年以來賊氛面面逼緊兵力處處牽掣若不量敵而進激於義憤取快一時設一發不可復制則大局立見決裂此臣展轉籌思未至其時不敢輕易言剿而確有所見實未嘗立意主撫也當苗沛霖與壽州紳練構釁之初臣曾縷敘其悖逆情形迨該逆圍攻壽州叛形愈著臣一面派兵攻奪渦河要隘一面催調李世忠進解城圍大隊距壽州四十里州城以內變告陷旋據翁同書委員陳之琦來言苗練進城後並未擾害官民苗沛霖祇求辨明心迹仍願剿賊立功其時勝保委員方模勳早到壽州力爲苗練剖白求臣代奏臣深知其詐因逆儀方張翁同書全軍潰散賈臻坐困潁州不得不代爲陳明以緩其勢而懈其心實未敢有意姑容也見在該逆復潁上獻狗逆

勝保極力鋪張以苗沛霖革面洗心出於至誠據其一面之詞觀之似藉苗剿捻以毒攻毒未嘗不可但苗逆之力攻潁上不過快其私憤欲多占城池廣收逆黨其擒獻狗逆實懼於兵威欲掩其通賊之罪而藉爲緩兵之策非眞爲國家出力也況捻逆張落刊粵逆陳得才等之渡淮實苗沛霖接引之臣愚以爲就使苗沛霖翻然改悔剿賊自贖亦罪在不赦何況陰狠反覆跋扈如常城池旣不肯讓公局復不肯撤練眾亦不肯散其並非改悔可知若不於此時亟圖之使得售其奸計假官勢以植黨不但偪脅良民較前更甚卽收納賊眾少一捻匪多一苗練其勢愈大其患愈深終必歸於決裂此苗沛霖之必不可撫也至勝保此來在朝廷不過欲其暫示羈縻以待兵力會合且冀其誘苗沛霖而除之耳乃不謂力排眾議甘心受其欺蒙百計爲之回護名爲派兵鎮守正

陽壽州其實壽州四門仍係苗練把持正陽祇許官兵另住小圩其正圩不許官兵入守沿淮私卡任聽增添正陽關卡雖換用勝保旗號其實仍係苗練抽收似此掩耳盜鈴將欲誰欺耶李續宜身膺疆寄以勦苗爲己任所部兵勇率皆精銳苗沛霖畏而惡之愆惡勝保多方詆毀萬難和衷共濟臣兩年來含垢隱忍以爲非楚皖會合不可輕舉今幸狗逆全股撲滅江淮一律肅清兩省兵力聯絡一氣若能協力同謀聲罪致討順逆之勢旣分向背之機立判則黨與自散逆餒自衰無所用其煽惑矣上諭前因洛陽喫緊諭令勝保督師前往攻勦並諭李續宜將淮北事宜妥爲節制本日據袁甲三奏因病懇請開缺該大臣在皖數年辦理並無成效惟臨淮向係袁甲三駐彼督辦一旦驟撤恐懷遠一帶捻逆從而生心因諭袁甲三暫爲督率聽候諭旨李續宜身任皖撫責

無旁貸疊諭該撫通盤籌畫苗沛霖心存叵測張落刑尙未就擒
苗捻各事應如何次第辦理潁州旣屬偏在北路臨淮爲南北要
衝應否該撫親督重兵駐守抑或派員前往該撫旣統領全皖軍
務自不得專駐六安而楚北門戶應如何兼顧該撫均當悉心籌
酌用慰廑念該撫爲李續賓之弟國憤家仇曾經自任數月以來
朝廷察其樸誠勇敢堪勝重任足以伸李續賓未竟之志袁甲三
旣經開缺則欽差大臣關防擬卽降旨交李續宜祇領用示事權
較重委任更專庶苗捻各匪益形畏服著接奉此旨後於數日內
將前後所詢各情並五月十三十八兩次寄諭迅速詳細覆奏聽
候降旨朝廷用人一秉大公惟視其人之才具心術假以事權該
撫不必務辭重任轉近推諉也將此由六百里密諭知之○諭張
亮基奏探明雲南實在情形並辦理滇練必須詳慎籌畫各摺片

張亮基自抵蜀以來籌辦滇省事情毫無把握所稱石逆分陷敘永廳城見檄飭林自清分堵滇省邊境與川省追剿之兵兩面夾攻亦可藉收其用等語是張亮基轉授之以柄將來藉詞索餉貽患無窮此事斷不可行著張亮基仍遵前旨飭令林自清速回滇省勦辦大理之賊本日駱秉章奏川省軍務方殷唐友耕一軍見與曾傳理等攻勦石逆唐炯亦督率所部規取松潘該二員勦辦正當喫緊不能抽調至川省庫款久已支絀京餉欠至六十餘萬兩軍餉台費等項積欠逾二百餘萬兩既不能爲滇省寬爲籌備若徒以數萬金聊且塞責何異杯水車薪於滇省究屬無補自係實在情形著潘鐸張亮基體察情形卽往滇蜀交界地方暫時駐紮俟川省賊匪漸次肅清餉源日見充裕潘鐸等卽統川省得勝之師大舉入滇爾時勦撫兼施庶可永杜禍萌廓清滇境張亮基

奏請飭部查明鄰近滇省之積功總兵請旨簡放提督之處向來無此辦法應俟該署督等到滇後再行酌量具奏將此由六百里各諭令知之○諭駱秉章奏張亮基徵兵撥餉川省軍務方殷力有未逮一摺本日亦據張亮基將探明雲南實在情形及在川省籌措兵餉各節馳奏張亮基既恐瀘永皆有賊勢孤軍難進又慮軍火餉銀道梗難達且入滇境後無兵不足以備非常有兵又非所以安反側覽其所奏辦理毫無把握至駱秉章所稱馬如龍等包藏禍心勢必中變若張亮基僅帶兵數千籌餉數月身入險地轉致墮其術中莫如置之不問使徐之銘暫且羈縻回眾俟蜀事大轉再移得勝之師令潘鐸張亮基統率入滇等語具見實心任事籌畫悉合機宜已諭令潘鐸張亮基俟蜀中漸次肅清再行移師大舉入滇矣見在石逆大股偏近敘郡著駱秉章嚴飭曾傳理

等督率各軍併力攻剿聚而殲旃以除積年巨患其張藍股匪竄陷太平等城若與鄧逆合夥則賊勢益張著飛飭果健營將弁會同毛震壽相機夾擊毋令深入陝境擾及完善地方其八角寨鶴遊坪等股匪並著該督激勵諸軍迅圖攻拔蜀疆肅清則剿辦滇省之兵與餉皆有所出屆時該督定能通籌大局克踐其言見在蜀省軍務總以迅速肅事爲要至張亮基摺內所稱涪州豐都難民呈控兵勇荼毒地方有甚於賊等語此股兵勇係何人統帶著駱秉章確切查明嚴加約束凡經過地方及駐紮處所務令恪遵軍令毋得藉端騷擾斂怨居民張亮基奏請擬於川東道庫暫籌借銀五萬兩以捐照抵撥歸款之處是否可行著駱秉章妥籌辦理將此由六百里諭令知之○庚申諭內閣陝西西安同州兩府屬漢回居民平日積有嫌隙往往尋釁互鬪地方有司辦理不善

心存姑息諸事寬縱遇有滋事回民延閣不辦又或心存歧視因係回民一切從嚴不辨是非曲直以致漢回民心均懷不服私圖報復日肆兇頑從前尋仇械鬪尙不過在一村一鎮之間並未敢結連各州縣同起滋事近因粵捻各匪竄入陝境西同兩府屬漢回同時並起紛紛燒殺渭河一帶村鎮俱成焦土疊據巡撫瑛棨將該處情形據實上陳覽奏曷勝憫惻國家撫育黎元漢回均係赤子一視同仁從未嘗稍存歧異乾隆四十六年甘肅番回作逆曾奉高宗純皇帝諭旨於凡有回民處膽黃徧貼斷不肯因滋事賊匪將無辜守法良民一併株連通諭中外等因欽此此次陝西漢回互鬪一案經瑛棨於起事之初卽會同前任都察院左副都御史張芾分遣官紳前赴各處曉諭解散其未經滋事之回民業已遵示誓與漢民永釋猜嫌乃奸回利於劫掠乘機徧脅輒將

安分回民一併燒殺似此悖理逞兇虐及同類不但朝廷法所難容爾回民中亦宜同深切齒見據瑛榮奏稱該省各營隊伍回兵居半不但武弁等於滋事兇回深惡其非卽各兵丁等亦同深憤嫉足見該良回人等深明大義甚屬可嘉見經檄調各路勁兵陸續赴陝剿辦但將爲首滋事回匪殲除斷不因回民中偶有恃強玩法之人卽將安分良回概行株累其良回中有被脅勉從者儻能悔悟解散一併免予究治該處漢民亦不得逞兇報復違者從重治罪如漢民中有藉械鬪爲名乘機聚眾滋事者亦概行一併剿除並不稍從寬假天戈所指但論曲直不分漢回順逆存亡悉憑白取經此次訓諭之後若瞽不畏死之徒猶敢肆其兇頑則是自取滅亡勿得藉口於朝廷之不教而誅也該撫卽將此旨刊刻謄黃剴切曉諭以示朝廷胞與爲懷之至意○李鴻章奏自五月

初九日後賊圍松江愈逼愈緊

臣

督令參將程學啟等自虹橋節

節進紮飭松江府知府賈益謙等堅忍固守咨催已革提督曾秉忠派撥礮船駛剿賊踞松江西門外妙嚴寺土山爲營逼城最近我軍以大礮轟毀其壘南門外大張涇賊營經我軍併力奪回初八日復爲賊踞郡城道路不通賊乘勢復踞西門土山爲礮臺益高其壘四門環攻志在必得賈益謙與李恆嵩等督率各隊環堞分列賊四處聚攻則以大礮轟之賊周圍馳驟則以排槍擊之兩日夜槍礮之聲不絕初十日甯郡調回之兵三百餘人適至與賊戰於孟福濱毀其礮臺至夜三更火光四起賊寂然無聲常勝軍及李恆嵩所部九百人分門出擊殺斃無算賊分股遁往西北常勝軍於十三日攻破天馬山賊卡十四日撤回松郡併力防守自賊圍青松兩城大設紮廣富林塘橋一帶而厚集於泗涇以拒我

軍臣軍距新橋前敵十餘里

臣

營距新橋又三十里港汊重重賊

狃於官軍之不能猝進也日夜添築營壘爲久踞計

臣

親赴泗涇

出賊不意薄其壘以創之十一日令程學啟等各帶五成隊先往

臣親督副將滕嗣林各營繼進直逼泗涇卡賊開槍迎拒我軍整

隊擁入斃賊多人立毀其卡餘眾竄過涇南拆毀木橋

臣

當飭張

遇春等分攻泗涇賊巢擊斃悍逆數百名二十一日僞聽王陳炳

汶僞納王郅姓糾悍賊五六萬直撲新橋營盤四面圍裹蔓及法

華徐家匯九里橋游氛緊急逼瀨城大隊圍攻程學啟營盤填濠拔

椿拌力死撲程學啟以槍礮抵禦然火不及則擲甌石擊之賊勢

逼近程學啟手然劈山礮開壁門大呼衝殺賊圍稍卻又排牆抵

進我軍復退入營

臣

乘賊力疲乏派參將張遇春等分路進剿而

日督參將郭松林等往援張遇春遇賊於九里橋賊以萬眾抗抵

卻屢前官軍併力夾攻賊陣稍亂張遇春躍馬過橋直取黃衣賊口馬傷墜地賊呼噪擁上張遇春拔刀斬倒賊目奪馬躍馳張志邦陣斬賊首賊匪驚駭陳飛熊等乘勢追至營邊賊復排大陣鏖戰程學啟等各開營門一擁而出橫衝直刺內外夾剿賊盡棄槍器械奪路狂奔自相踐踏而臣即督同程學啟等分投追殺該逆連夜收回泗涇是日殺賊三千餘名落水淹斃及解散脅從亦數千名生擒四百餘名二十三日乘夜進攻泗涇程學啟等分路直前該逆喘息未定不戰自走當將賊營數十座全行踏毀燒賊柵二十餘一面併力追剿賊向崑山青浦竄去其松江附近廣富林塘橋大橋等處踞賊亦全數遁走此次逆黨號稱二十餘萬竄入浦西各路勢已燎原雖臣從事浦東剿撫兼施收復南匯川沙奉賢柘林等處斷賊接應而該逆垂涎滬上一日未忘幸賴

聖主威福軍士用命以少勝多實非始願所及所有參將程學啟等謹先行開列應請 皇上量予恩施以昭激勸其餘出力員弁

兵勇容

臣

查明擇尤請獎陣亡弁勇咨部分別議卹又奏

臣

接督

臣曾國藩來函頗以進攻金陵兵單爲虞又接曾國荃金陵來信

我軍祇能圍其西南兩面深溝高壘以水師爲根本以江面爲糧路先爲自固徐圖制賊非添二萬餘人不能合圍訊據賊供洪逆調蘇浙兩處之賊回援恐成持久之勢 臣查金陵城大而堅從前和春張國樑擁八九萬之眾圍攻日久功敗垂成今蘇浙兩省徧地皆賊處處可以進援尤與當日情形迥異所恃楚師穩練較勝他軍賊數眾多未盡精悍曾國荃以水師爲根本當可立足但軍數不及二萬其力不足以合圍卽未能制其死命此次僞忠逆黨與撲犯松滬負創而遁聞將連合杭湖賊眾赴救金陵 臣深代懸

慮亟欲馳往鎮江就近援助無如臣原部陸軍僅數千人分兩處

則均不得力專一路則尚可自立兵事重大何敢易言臣忝任蘇

撫既不能棄滬中每月二十萬餉源之地又不敢緩鎮江接應上

下游各路之師左右思維實無長策至滬上原有水陸兵勇逐營

簡汰整頓非臣親自部署不能鈐制所帶諸將中尙有勇敢樸實

之材實少應變馭眾之選且資望皆淺未可令其獨當一面臣到

滬後稍集軍民之望未便輕自移動遽失眾心曾國藩處似亦無

統兵大員可派來滬可否容臣將滬事辦妥卽移師出江以慰

聖座至馮子材等催臣前往鎮江實欲臣到後爲該軍籌餉未必

爲進剿起見見在江北完善地方所出之餉專供都興阿一軍尙

無缺乏江南祇存鎮滬兩處每月僅能由滬分給並無他處可籌

銀款臣實深內愧馮子材尙能戰守而兵勇疲情已非一日長江

師船大半劫奪成風臣卽頡頏其間祇能自立一軍未便控制諸將若輕言整頓先失和衷之義若親軍太少亦無整頓之資此皆實在爲難情形臣不敢稍有徇隱 上諭議政王軍機大臣等據李鴻章奏官軍擊賊於新橋等處連獲大勝松郡解圍滬防肅清及密陳請將滬事辦妥再行移師出江赴鎮各摺片賊首僞忠王糾合蘇常逆黨竄入浦西各路經李鴻章先從浦東剿撫兼施收復南匯川沙各廳縣斷賊接應而賊垂涎滬上以悍賊五六萬眾併一圍攻新橋各營參將程學啟等堅守苦戰李鴻章親督參將張馮春等各軍會合夾擊大殄兇鋒所辦甚協機宜有此力戰大勝非惟可寒賊膽而固眾志亦使外國人誠心出力以爲我助李鴻章見在未能離滬而鎮江地方亦極關緊要必須妥籌兼顧著卽將滬事迅爲妥辦以便移軍赴鎮鎮城兵單餉絀該撫迅卽知

照馮子材激勵兵勇固守一面飭令吳煦將應解鎮城月餉源源接濟曾國藩大軍進逼金陵兵力尙虞單薄蘇浙兩省之賊隨在可以赴援當茲功在垂成尤宜策畫萬全不在急收旦夕之效我軍斷不可稍有挫衄前者和春張國樑等可爲深誠李鴻章接到曾國荃函稱我軍祇能圍賊西南兩面以水師爲根本江面爲糧路溝壘自固徐圖制賊等語頗爲老謀惟應籌增兵力此時各路實無可調撥仍著曾國藩自爲籌計其有何路之兵可資策應者卽行奏聞飛速調撥本日據瑛棨奏省外回匪兇勢更熾亟盼多隆阿何紹彩各軍赴援見在陝省情形喫緊而皖省地方爲曾國藩大營後路亦須得力大員督率重兵駐守以資控制多隆阿應否統率全軍赴陝或僅令雷正綰所部入關助剿之處仍著官文曾國藩迅速會商權其緩急輕重妥爲調度雷正綰所部兵數若

干是否足敷援剿之用並著官文曾國藩多隆阿迅查具奏何紹
彩一軍俟金國琛所部到鄂西後官文卽行酌度催令入陝助剿
毋稍遲緩左宗棠由衢州一帶進取劉培元蔣益澧等軍先後可
到兵力較厚慶端駐紮浦城其所統率之秦如虎林文察等軍由
溫處進兵見當金陵逆首調令各路賊黨赴援浙東西之賊勢必
空虛該督撫等尤當襲間蹈瑕力圖進剿既可乘機恢復尤可牽
制赴援金陵之賊使之奔命不遑則曾國荃等軍攻擣更易爲力
著曾國藩左宗棠慶端等隨時咨商合力辦理至鮑超一軍自踏
平寒亭賊壘後我兵是否得手並著曾國藩迅催該提督奮力攻
取以圖節節進剿其張威邦一員昨據袁甲三奏已由李世忠派
員解赴曾國藩軍營著卽秉公訊辦據實覆奏將此由六百里各
諭令知之○諭托明阿等奏川匪竄入陝南官軍收復定遠西鄉

失陷瑛檄奏回匪兇燄日熾請明降諭旨分別良莠又請將陝西
征兵調回各摺陝省外寇甫退而漢回互關所在響應實爲腹心
之大患亟宜剷除兇逆安撫善良以昭平允而示勸懲本日已照
所請發去明發諭旨一道瑛檄於奉到後著卽刊刻謄黃自省城
以及各府州縣一體頒行宣布成明等所帶京兵二千名應畱於
蒲州一帶防堵未能悉眾赴陝所請將直隸等省前調陝西官兵
盡行撤回以實營伍已諭令軍機處俟有各路軍營廷寄便卽諭
知各帶兵大員酌量遣撤惟各營得力之兵未必驟能撤回亦必
須統帶得人方足以成勁旅且恐緩不濟急於事無補瑛檄等惟
當就見有兵力相機剿撫不得專待客兵致滋延蔓瑛檄前奏張
帶在倉頭鎮被回眾拘畱本日奏報未據提及並著將實在情形
迅速探明具奏以慰廑念毛震壽已抵漢中卽著飭令將漢南一

股迅圖撲滅並將西鄉克復俟該處軍務辦竣再行進省以專責成駐紮子午谷之徐榮桂一軍瑛榮務須飭令實力防剿其漢江北岸下游各州縣通飭一體嚴防不可再有疏失西鄉文武下落均著查明分別辦理將此由六百里各諭令知之○予浙江殉難道員赫特赫納祭葬世職○辛酉諭議政王軍機大臣等前因鄭元善奏陝省竄出粵匪盤踞新安澠池一帶又有虜氏竄回皖境股匪閒道西馳恐其侵軼洛中並北走河干東偏汴梁當經寄諭勝保馳往河洛督軍剿辦該大臣此時當已奉到著卽懷遵前旨迅速起行河洛地處四達之區賊勢猖獗意圖窺覷責令勝保移軍督剿倚任至重卽須親統各軍盡力剿洗及早肅清中原腹地以慰廑念見在鮑陽踞匪亦經剿辦得手卽應飭令派定各軍與鄭元善所派袁保慶等兵奮力攻擣迅速肅事陳大澐等滋擾汝

光各屬與官軍抗拒經年又與張落刑句結粵捻各匪狼奔豕突
尤爲肆行悖逆若使勢窮就撫率行收降何以申國憲而振軍威
且該逆首黨與眾多難保不乘閒復生反側所籌准予陳大濬投
降之處著不准行並著鄭元善飭令豫省之軍與已抵信陽之楚
軍等合籌攻剿毋稍延宕鄭元善前奏請飭勝保進紮河洛並稱
已咨商僧格林沁抽撥馬步千名及咨毛昶熙派令遊擊敖天印
勇丁前往會剿該大臣行赴河洛著卽催提各軍與鄭元善會商
進剿如賊眾兵單不敷剿辦仍將畱皖各軍一併調往以厚兵力
僧格林沁業經攻克金樓賊寨卽當進擣蒙亳老巢該大臣速抵
河洛使僧格林沁之軍不須兼籌西路調撥更可無虞牽掣也昨
據瑛棨奏兵力不敷分布請將各路軍營防剿之陝省弁兵撤回
以資調遣著勝保鄭元善查明各該營有無陝省弁兵能否遣撤

歸伍之處妥籌覆奏將此由六百里各諭令知之○壬戌諭內閣
駱秉章奏剿匪獲勝克復太平縣城一摺滇匪張第才藍朝柱分
股自鶴遊坪下竄撲陷太平縣城經知縣易佩紳等分路進剿連
環轟擊斬馘無算乘勢直逼城下餘賊狂奔出城各營窮追二十
餘里斃賊二千餘名解散者不計其數遂將太平縣城克復辦理
尙爲迅速所有在事出力員弁著駱秉章擇尤奏請獎勵該縣文
武下落並著查明辦理○諭前因駱秉章奏參藩司副將貪鄙不
職當經降旨將祥奎革職張定川革職拏問交駱秉章嚴行查辦
茲據該督查明按律定擬具奏此案祥奎於籌備軍餉率行飭屬
按畝捐輸加派追呼以致刁民聚眾抗捐實屬辦理不善業經革
職著永不敘用以爲溺職者戒已革副將張定川承辦軍裝器械
等項偷工減料又侵冒公項銀兩爲數甚鉅實屬有心侵欺張定

川著照擬斬監候並著賠繳三成銀九萬三千六百餘兩勒限一年監追張定川之子補用知府張廷奎毫無勞績屢經蒙混得選保薦濫膺名器著革職永不敘用其與張定川結交之候補遊擊張正倫身體軟弱難期振作著勒令休致鎮遠營都司劉華逢迎奔競聲名惡劣著卽革職太平營遊擊戴廷超雖與張定川有師生之誼惟平日操防尙勤著以守備降補○諭議政王軍機大臣等昨據托明阿等奏川匪闖入陝境西鄉失陷業經諭令瑛棨等飭毛震壽將漢南股匪迅圖撲滅並將西鄉克復再行進省茲據駱秉章奏太平克復賊向陝境逃竄已飛咨瑛棨並知會毛震壽速由漢中撥兵堵剿惟毛震壽所部僅止千餘恐兵力不敷剿辦著駱秉章卽飭易佩紳督率所部楚勇得勝之師乘勝追擊並著瑛棨飭令毛震壽等軍乘該逆敗衄之餘兩面夾擊收復西鄉盡

殲醜類以除川省邊患該督等當不分畛域相機會追迅圖撲滅
毋令該匪深入陝境蹂躪完善將此由六百里各諭令知之○癸
亥諭議政王軍機大臣等吳棠奏官軍剿辦郟海交界土匪漸次
肅清並飭駐海兵勇約會東軍攻剿一招據稱龔耀倫等收撫勞
支圩後郟海交界土匪漸次肅清而邳州東境高歸股匪經總兵
黃國瑞等攻克瓜埠賊圩後高歸遁回蘭山縣境之杜家堡圩請
乘此窮蹙之時約會東軍進剿等語所見甚合機宜著卽節節進
剿將高歸一股乘機殲除以靖地方吳棠已咨德楞額派隊協剿
卽著迅催定期夾擊毋致坐失事機惟德楞額前諭攻剿鄒縣教
匪而扎隆武等兵不滿二千是否足敷分撥譚廷襄亦當迅速籌
畫酌撥兵勇會同吳棠派出之軍合力攻剿該撫身任封圻儻使
清江兵練孤軍無援東境轉置不問尙復成何事體吳棠另片奏

遵籌泰壩鹽釐每引劃分三百文以濟鎮餉等語著照所請每引劃撥三百文解交鎮江軍營充餉鎮江餉需雖近支絀惟前據李鴻章奏稱由上海月解三萬兩充餉茲又劃解泰壩鹽釐合之外江各釐捐並新增花布等項捐款每月有著之款殊不爲少當此各營同形支絀之際馮子材魁玉務當撙節支放毋得藉口軍餉不充防剿稍形鬆懈也將此由五百里各諭令知之○諭毛鴻賓奏援剿黔省銅仁匪徒防剿苗教各匪並辦理粵西恭城土匪一招黔粵兩省與湖南毗連地方袤延不下千里路險多歧見在銅仁石阡思州松桃天柱各屬幾於徧地皆賊乃黔省並無特派一兵一將會合楚軍兜剿殊出情理之外韓超身任專圻田興恕以本省專闢大員於該省軍務並不實力辦理專恃楚師防剿該撫等所司何事且以各兵剿土著之賊旋滅旋起迄無了局該撫等

自問何以自安縱賊殃民深負疆寄韓超等豈能當此重咎耶著
迅派兵勇馳赴下游會合楚師併力勦辦並慎擇地方官撫輯良
民威德並施以期一勞永逸粵西恭城土匪見經營弁鄭通榮等
前往招撫其張高友一股著劉長佑飭屬認真辦理不准任令蔓
延鄰省貽誤無窮仍著毛鴻賓不分畛域將黔粵兩省交界地方
匪徒會同該省悉力勦辦迅圖撲滅毋任蔓延將此由六百里各
諭令知之○諭英桂於河東鹽課項下月撥銀五六十兩協濟江
北糧臺○諭多隆阿等迅勦河洛等處竄匪並飭雷正綰入關勦
撫○甲子諭內閣前據大學士會同刑部定議何桂清罪名以情
節較重請於斬監候律上從重擬以斬立決當因何桂清曾任一
品大員復諭大學士六部九卿翰詹科道將何桂清各供並給事
中郭祥瑞謝增等請將何桂清速正典刑各摺再行會議以期眾

議僉同茲據大學士桂良等公同會議請仍照原擬將何桂清比照守邊將帥被賊攻圍不行固守而輒棄去因而失陷城寨者斬監候律上從重擬以斬立決並據大學士銜禮部尙書祁雋藻等奏各招以刑部原奏卽稱徧查刑律如臨陣先退棄城而逃失陷城寨等條均罪至斬候而止明知舍此本律不能改引又云情罪較重擬以斬決是爲擬加非律非臣下所得擅請等語此案何桂清以總督大員駐紮常州當丹陽失守賊氛緊急偏節節退避以致蘇常松太各府州相繼淪陷且於革職拏問後展轉藉故逗遛兩載延不赴部苟且偷生罔顧法紀迹其罪狀昭著若 文宗顯皇帝當日因其情浮於罪將其正法軍前中外臣民當無異議惟見已拏解來京且疊經廷臣等會同刑部定擬罪名自應按律科斷卽不必於律外施刑以昭公允何桂清著仍照本律改爲斬監候

歸入朝審情實秋候處決此係爲查照定律詳慎用刑起見非謂何桂清情有可原將來可從末減致蹈輕縱也○諭本日據大學士銜禮部尙書祁寯藻兵部尙書萬青藜內閣學士桑春榮順天府府尹石贊清府丞林壽圖內閣侍讀學士王拯鴻臚寺少卿彭祖賢給事中唐王森等遵議已革總督何桂清罪名請照本律定擬各一摺均以大學士會同刑部原摺於本律外有所引伸尙未允協朝廷刑法自有定章凡罪名大小一經刑部查明專條本律卽當執持一是援引入奏不得於律外絲毫有所增加意爲輕重嘉慶年間歷奉 諭旨引律斷獄不得於律外又稱不足蔽辜及從重等字樣 聖諭煌煌永宜遵守今大學士會同刑部定擬何桂清罪名據稱查刑律如臨陣先退等情節各條均罪至斬候而止何桂清貽誤地方情節較重應照斬監候律上從重擬以斬立

決等語何桂清應得罪名既有斬監候專條自應按律問擬以持
刑罰之平何得任意出入於律外復加從重字樣以致執法失中
隱釀刻深之弊嗣後問刑衙門務當恪遵成憲專照本律科罪不
得深文曲筆抑揚其詞於律外任意加等以副朝廷明慎用刑至
意○諭本日據大學士等奏會議何桂清罪名一摺其戶部侍郎
董恂以堂司回避都察院左副都御史志和等以師生回避均未
列銜國家設立科條凡官吏於訴訟人有關受業師及舊爲上司
者例應回避至臣下於奉旨派審案件亦有具摺呈請回避者其
准否均須候旨此案何桂清以一品大員朝廷慎重刑章特令大
學士六部九卿翰詹科道再行會議原欲參之眾議用示大公豈
尋常聽訟之例可比各該員等自應準情科罪各據所見奏聞如
有回避亦可於奉旨後具摺陳奏候旨遵行何得並不奏明臨時

藉詞回避置身事外以私情廢公論爲諉卸取巧地步所有此次會議未經列銜之董恂志和孫如僅潘祖蔭董元章衍秀孫楫劉毓楠梅啟照朱潮呂序程任兆堅等均著交部議處○諭議政王軍機大臣等田在田奏攻剿奶奶山踞匪先將前後南北四寨克復並剿撫附近捻圩一摺奶奶山賊巢盤踞徂北梗阻餉驛道路前經田在田屢攻未下此次先將山西前後兩寨山上南寨設法攻破並收撫附近各圩旋即紮營圍困北上寨亦卽克復生擒捻首楊大才等正法辦理尙爲奮勉惟該匪股數本多若稍爲鬆勁難保不乘虛衝突再事蔓延著田在田迅督在事將弁將此山逆眾奮力殲除以清徂北大道毋得日久遷延致他處援賊紛來辦理又形棘手其古饒集以西各賊圩並著乘此聲威剿撫並用如兵力不敷卽商令吳棠撥隊助剿並嚴防竄撲清淮一帶務須就

地殲除袁甲三前奏已派兵前往著卽飭令會同田在田所派各軍併力籌攻無稍觀望如山大賊多未能圍困仍著該大臣添派隊伍以期一律廓清永除後患將此由五百里各諭令知之○諭張亮基奏雲南事難再緩仍欲早行入境並林自清已由納谿至瀘州委員馳往察看辦理各摺片潘鐸張亮基能早入滇省可以撫集流亡繫屬人心將徐之銘之倒行逆施急圖挽救見在滇中回夷既有就撫之信若能乘機利導互用恩威使滇事早得就緒自爲正辦惟林自清業已行抵瀘州究竟練眾實有幾何斷不可令其與川中股匪勾結駱秉章既有於折回時酌給米石之事卽著該督等飭令折回滇省攻剿大理逆匪方爲妥善潘鐸張亮基等何以毫無偵探任令突至瀘境殊屬非是著卽取道赴滇將林自清率領前往如再觀望遷延致令別滋事端惟該前督等是問

張亮基前奏擬於川東道庫暫借銀五萬兩以捐照抵撥歸款曾諭駱秉章妥籌辦理如果張亮基能令該練遵卽回滇自不應惜此區區之費儻不早爲籌款安撫俾得迅速迎機妥辦稍事蔓延則所費恐不止此數也均著駱秉章潘鐸張亮基商同辦理潘鐸張亮基總宜將一切進止機宜面爲商定勿致參差但能於事早圖補救駱秉章諒亦不堅執前說至張亮基所請將查辦各案酌量輕重之處豫爲明降諭旨俾得臨時察度宣示所有查辦各案情形此時何從豫酌輕重該前督所慮事處其難恐有臨時不及請旨之處儘可一面相機辦理一面奏聞若欲使邊隅亂後知朝廷之所以尊尤在該督等之宣布威德俾知懾服也將此由六百里各諭令知之○乙丑諭直隸捕蝗○諭都興阿等嚴巡江面截剿金陵援賊○予河南陣亡知縣王其昌等祭葬世職建祠○丙

寅諭內閣慶端奏查明台州樂清兩城克復情形一摺上年逆匪竄踞台州府樂清縣城經道員蘇鏡蓉等約會民團水陸分攻各門於本年四月間將台州郡城克復其樂清踞逆經知縣孫家丞號召團丁攻勦武生周倫光等率團截殺復經總兵秦如虎等派兵進擊卽於四月十九日收復縣城其磐石寨城亦經巡檢汪墉等並該處紳團卽時收復樂清境內肅清浙省郡縣民團或冒死詐降或聞風內應同仇敵愾連拔堅城可見鄉曲偏隅之民咸知大義全在地方文武官紳爲之倡率辦理甚屬可嘉樂清學教諭王遲前於該縣失陷時罵賊不屈殉難殊堪憫惻著交部照例議卹○諭議政王軍機大臣等托明阿等奏回匪猖獗見在分隊數千攻撲省城請飭催京兵渡河來陝各等語回匪叛逆顯著亟宜痛加勦洗以儆兇頑著官文多隆阿嚴催雷正綰統帶兵勇星速

入關會同瑛棨等懾以兵威勒令該回民將爲首滋事之人獻出懲辦其被脅勉從者酌量散遣惟回匪傳單已蔓延西安同州十數州縣勢熾甚張恐雷正綰一軍不敷分剿多隆阿本有督辦陝西軍務之責仍著該將軍督率後起各營相繼前進該省望援甚迫務當剋期抵陝迅解倒懸鄭西髮逆見旣回竄逼近商南鄭郡情形已鬆金國琛早已到鄭足資防守著官文等速飭何紹彩就近馳赴西安以厚兵力瑛棨奏楊飛熊已派縣丞張寶禧等分撥兵勇入關著鄭元善仍飭楊飛熊統率所部卽日由潼關赴援毋再遷延貽誤同州被圍已久亟應調撥勁旅力解城圍洛陽已無賊蹤晉省河防不甚喫重且陝省回匪未肯遠竄英桂但能將本境回民妥爲約束其沿河船隻隨時提泊北岸晉疆自可無虞所有駐防蒲郡京兵卽著成明統帶渡河迅解同州之圍相機進剿

孔廣順馬德昭均係特旨起用之員宜何如激發天良力圖報稱孔廣順數月以來何竟一籌莫展西安駐防之兵亦有數千何以托明阿不能激勵將士出奇制勝見在該省軍情喫緊該將軍等責無旁貸著托明阿瑛榮孔廣順馬德昭趕緊布置省防一面就見在兵力分投剿截毋得專待援兵致附近居民慘遭殺戮經此次訓飭後儻該將軍等不知愧奮竭力剿辦任令回匪日肆鴟張定將托明阿等從重治罪決不寬貸將此由六百里加緊各諭令知之○丁卯諭議政王軍機大臣等官文嚴樹森奏楚軍進剿豫捻踴毀賊寨賊卡一摺豫省信羅一帶捻巢林立爲楚豫邊境之患經官文等調派楚軍分路進剿副將周鳳山擊敗澁港踞賊隨將靑山店等處賊卡踴毀道員歐陽正墉將王家岡捻寨焚毀並擊退邢家集援賊五里店有樊紹薪等詣營投誠高家店復有孟

王恩等投誠均經周鳳山准予自新並自領親軍將賊目擒斬辦理甚爲得手卽著官文等飭令該副將等乘勢進攻一面飭李續燾新募赴豫之軍由武勝關疾進將信陽之明港正陽之陡溝老巢約會同時進攻毋稍稽遲信羅一帶亦爲擒匪巢窟今新到楚軍氣勢甚盛再得本省兵爲之嚮導更爲得力著鄭元善迅速撥派勁兵夾擊盡殲醜類毋畱餘孽至投誠之樊紹薪等著官文等飭知周鳳山務當詳察妥辦毋得稍涉大意將此由六百里各諭令知之○諭薛煥奏籌辦比利時國通商事務大略情形並鈔錄照會呈覽一摺辦理甚合機宜深堪嘉尙該國公使包禮士有訂於六月初四日與該大臣會晤之語諒薛煥業已晤商其是否停止赴京見在會晤後如何情形卽著隨時具奏該大臣於辦理外國事務本能諳悉此事卽責成薛煥悉心經理總期無損國體所

定章程尤須使將來皆可倣照辦理諒薛煥熟悉情形無俟諄諄訓誡也○戊辰諭內閣僧格林沁奏臚陳軍營及地方積弊一摺前因各路軍營積習日深曾經通諭各營痛除諸弊力加整頓今僧格林沁所奏意見亦適符合各路統兵大臣及督撫大吏奏報情形多至失實或市恩麾下見好屬員每以將佐一戰之功遽行越級優保或獲咎文員營謀到營稍有微勞即可奏請開復原官賞重罰輕何以昭激勸而勵戎行若爲將帥者謂有賊可以固寵爲督撫者謂敷衍可以保榮居心更何可問僧格林沁以督兵大員肯將軍營積弊據實上陳具見公忠體國不染習氣甚屬可嘉見在各路統兵大臣及督撫大吏實心任事者固不乏人而粉飾因循不知振作者亦復不少嗣後奏報情形儻仍前含混欺飾任意鋪張或濫保無功市恩邀譽並妄爲獲咎劣員開復處分以致

紀律不嚴軍心解體經言官參劾或朝廷別有訪問必將該大臣督撫等從重懲處以肅軍律至軍行首重餉需近來各省徵收錢糧率多缺額州縣牧令每遇偏隅水旱或賊竄邊境卽以合境均被災擾報請蠲緩仍行私徵肥己道府代爲緘默大吏徇情姑容以致吏治日弛餉源日絀實堪痛恨著各督撫嚴行查察如有此等情弊立即據實參辦毋得再事寬縱儻仍積習相沿不加整頓必將該督撫嚴行懲處毋謂誥誡之不早也將此通諭知之○僧格林沁國瑞奏臣等攻克金樓後於六月初二日移營夏邑派營總常山保帶領馬隊前赴營郭復派侍衛托倫布帶領馬隊赴永城迤北之順和集駐紮以便會合富和馬隊相機進剿一面於永夏亳宿一帶出示曉諭准脅從人等悔罪投誠以期解散賊黨近據富和稟報將永城迤北之劉家河寨王家集寨等處賊圩收復

殲賊多名投誠百餘名其餘被脅難民一律薙髮會同地方官妥爲安插見在臣等督飭富和等帶領馬隊進攻韓家集賊巢至恆齡等帶隊在亳州迤北連日進攻先後收復閭家集吳廟吳莊王樓四圩亦均呈繳槍礮卽擬進攻廬廟賊圩臣等仍當督飭設法辦理以期次第廓清惟刻下天氣炎熱馬隊患病者居多且高粱叢茂大雨時行馬隊礮車均難施展擬令駐紮永亳之軍先將附近賊圩次第剿撫一俟秋高氣爽再當節節前進至鄒縣教匪時出竄擾前派總兵札隆武等帶領兵勇駐紮曲泗又派健銳營翼長海羣帶馬隊二百餘名前往會同剿辦合之譚廷襄所派兵勇統計馬步各隊不下三四千名惟無統率大員督剿誠恐難期得力可否請旨飭下山東撫臣譚廷襄出省駐紮兗沂之間督兵剿辦以期事權歸一 上諭議政王軍機大臣等據稱移營夏邑後

收復各圩見飭富和等分攻韓家集廬廟賊圩擬俟秋高氣爽節
節前進所籌甚合機宜永毫之軍剿撫附近捻圩聲威已振諒該
匪不敢裝旗出竄刻下天氣炎熱馬隊患病者多著卽飭恆齡等
將未下各捻圩剿撫兼施次第收復一俟天氣涼爽卽行剋期大
舉以期一鼓蕩平如老巢賊匪或出擄糧外援各匪紛來救應仍
須嚴飭在事各員弁奮力剿洗不得稍形鬆懈進止機宜在該大
臣隨時酌度不爲遙制至鄒縣教匪雖經扎隆武等相機剿辦惟
無統率大臣恐帶隊官無所稟承難期得力著譚廷襄卽行出省
駐紮兗沂適中之地督兵剿辦以一事權該處馬步兵勇共有三
四千人兵力不爲單薄該撫身任封圻責無旁貸應卽趕緊出省
督剿以息寇氛而安疆圉將此由六百里諭令知之○諭僧格林
沁奏敬陳管見一招懑言外間統兵將帥封疆大吏奏報不實以

及吏治廢弛兵餉支絀種種積弊議論均及真切具見該大臣公忠體國之忱業經明降諭旨申飭各路統兵大臣及各督撫痛加振作矣蔣琦齡前奏監軍一條當經降諭駁斥因此等重寄若用非其人不獨扶同徇隱且恐騷擾地方顛倒是非漢唐以來流弊滋多所以卒至於不可行也該大臣所稱奏報不實徇情濫保諸弊誠爲近來軍營所不免而最甚者莫如勝保軍營勝保之不可恃朝廷久已洞悉因其時壽州旣陷潁州危急誠恐苗沛霖或再勾合張落刑圖謀北犯楚軍尙在皖省西南鞭長莫及不得已令勝保前往羈縻以緩其勢非眞謂苗沛霖之可撫也嗣勝保以苗沛霖擒獻張落刑爲歸正確據屢代乞恩而朝廷僅許其免罪亦未遽信勝保一面之詞迨李續宜抵皖後閱其先後章奏於苗練一節並未嘗一意主剿而較之勝保事事將順遷就辦理似覺結

賁徒以張蔭刑尙未殲除而苗練無人駕馭是以不能遽撤勝保之兵適因豫省河洛捻氛告警因特命勝保移兵前往令其暫與苗沛霖相離亦正所以使李續宜事權歸一可以從容展布也惟李續宜之兵究在皖省以南而北面無重兵控制終非妥善見在僧格林沁進紮亳州距苗圩較近於李續宜之軍亦可聯絡且於苗沛霖之應剿應撫見聞較確僧格林沁在軍營多年歷練老成胸中必有成算著卽將實在情形迅速具奏僧格林沁若能接辦此事控制於北李續宜坐鎮於南則察苗沛霖之向背從違以定剿撫必能和衷共濟同奏膚功其如何辦理之處著迅速具奏卽降諭旨將勝保酌撤並將其所部之兵併歸僧格林沁統帶以一事權將此由六百里密諭知之○已巳諭議政王軍機大臣等潘祖蔭奏請添設四界重鎮以專責成一摺據稱江蘇安徽山東河

南四省邊界捻匪猖獗封疆大吏未忘畛域致使草澤奸民日肆蔓延賊之出掠回巢任其所之團練堅壁之弊又使圩寨頭目恣睢跋扈隱爲心腹之憂徐州府屬地當孔道設有四界司一官實爲四省交衝擬請添設四界鎮總兵一員四界分巡兵備道一員四省沿邊州縣悉歸節制田在田一軍應將其見統兵數挑選淘汰作爲四界主兵其有不足再由四省添撥規畫既定備禦必周等語江南山東界連皖豫地方捻匪縱橫近復圩寨林立官軍防剿往往不敷賊得乘虛肆其荼毒且有兵至乞降兵去復叛者見在僧格林沁攻拔金樓賊巢不日進擣蒙亳卽令埽穴擒渠亦必妥籌善後之策該京卿所奏不爲無見著僧格林沁曾國藩吳棠李鴻章李續宜譚廷襄鄭元善按照所請悉心妥議是否可行詳悉具奏各處投誠匪黨反側靡常該統兵大臣及各督撫給以免

死旗號應卽如何爲之限制仍不得句結團聚復行滋擾並著僧
格林沁等妥籌辦理該京卿所陳鄒縣鳳皇山一帶之匪既降復
叛擁眾數萬公行劫掠是否實情見在作何辦理著譚廷襄查明
據實具奏田在田之兵今春在宿遷開槍攻毀民圩並搶奪守城
將弁器械並不查究其所部兵勇皆潛與賊通是否屬實著僧格
林沁吳棠會同查明具奏另片奏楚軍乘勝近逼金陵大局安危
所繫鎮江揚州已有備禦惟通州靖江泰興等處江港可通者十
餘處由江南太倉常熟江陰出口卽能闖入賊若乘虛擾及裏下
河等處江北軍餉無籌卽全師不壯等語著曾國藩李鴻章設法
兼顧派令妥員防守保全完善之區原摺片均著鈔給閱看本日
據曾國藩奏到鮑超進逼甯國由抱龍岡等處攻擊甚爲得手曾
國荃之兵亦於雨花臺獲勝惟賊援甚眾地大兵單金陵有難剋

日進攻之勢前諭該大臣慎籌進止一切機宜原以時會難得而兵力究有未敷此時惟當策畫萬全以期必勝是爲至要將此由五百里各諭令知之○曾國藩奏近日軍情嘉定青浦兩城被髮逆巨股圍攻逆燄殊熾李鴻章所派湘淮各勇駐紮虹橋者被髮逆四面圍裹李鴻章親往援救五月二十一日內外夾擊大獲勝仗惟賊氛環逼李鴻章目下斷不能移紮鎮江楊載福於二十三日到皖後旋至舒城與李續宜會晤一次再駛往金陵籌商戰守事宜曾國荃圍金陵之師於五月十二十三日在雨花臺獲勝一次惟地面太寬兵力太單多隆阿又統兵入陝不能踐東下會剿之約近聞僞忠王蘇州大股將援金陵陸路孤軍深入旁近無勁旅援應頗爲可慮鮑超一軍於五月十五日進攻甯國之抱龍岡等處連平賊壘獲勝已於敬亭山三面圍逼甯國賊多糧少尙可

得手報聞○調張之萬爲吏部左侍郎以李棠階爲禮部右侍郎

由大理寺卿遷

○庚午袁甲三奏臨淮南路由攻毀楊團圖等十餘圩遠

近人心均已歸正惟朱家圩因匪首朱盛堂被官軍擒獲解營正法其兄朱長貴率領死黨五百餘人負隅抗拒總兵張得勝督率勇練周圍挑挖長濠以困之該匪屢次衝突均經偪回並絕其樵汲一面開挖地道該匪於六月初六日率黨數百人拌命出竄官軍攔截兜剿殲斃極多餘眾向西奔竄官軍追逐二十餘里至永康鎮迤西斬擒淨盡隨將該圩平毀地方一律肅清其臨淮北路捻逆任柱楊含等股麇聚晏路口占踞王楊兩姓民圩阻我進兵之路總兵吳秀副都統克蒙額等馬隊自漁溝馳回靈璧縣城會合總兵徐鵬由韋家集兩面夾擊徐鵬先於五月二十八日密派隊伍乘夜襲攻直擣楊家莊賊圩副將李振國等各帶奮勇越濠

而進賊眾驚駭紛紛越牆逃遁我軍截殺二百餘名苗將楊家莊賊圩平毀是日吳秀等趕至晏路口迤北十餘里之蘇家圩偵知徐鵬業已攻破賊圩一座於二十九日黎明直逼王家圩賊以馬隊迎拒我軍擊斃執旗賊目一名賊眾退入圩門死守徐鵬等帶隊踵至新收各圩無不派丁助剿四面合圍該逆於六月初五日夜突圍西遁我軍追至二十餘里之寨子山擒斬二百餘名晏路口一帶已無賊蹤見探敗賊遁回宿州之湖溝老巢邊馬至曹老集一帶窺探欲由滄南再擾東路臣已飭吳秀徐鵬等馬步卽由晏路口節節前進一面添撥副將蔣得遇等由王莊會合原駐固鎮兵勇兩路夾擊以次埽蕩與徐宿官軍聯絡一氣宿州境內花莊任橋一帶向爲捻逆偪脅蓄髮從賊此次聞臣營收撫滄北一帶民圩懾於聲威多有來營求撫者是否真心向化固不可知但

藉此解散賊黨未始非計臣已諄飭該將領等相機辦理又奏勝保自統兵以來貪淫無狀人所共知請爲我皇上約略陳之金安清著名奸猾精於鑽營賄賂遠近所知勝保奏派辦捐豈真爲軍餉計耶臣聞金安清於咸豐九年八月間遣其姪通判金桂榮饋送勝保花木二十盆黃金二百兩勝保爲其請布政使銜以酬之蒙先皇帝駁飭復爲請二品頂戴亦未邀俞允金安清見其可以利動也謀之愈力勝保丁憂回京自宿遷一路辦差供應直至京城糜費不下鉅萬又爲之沿途代索奠儀由數千金至百數十金不等臣到皖後調閱金安清捐案率多稟報不符奏請飭令該員來營清釐乃該員並不遵照來營勝保旋有奏調金安清之請明係懼有敗露設計彌縫臣以勝保爲將帥大臣國體所關未便吹求奏明由勝保就近督飭結算所以保全其名節也乃金

安清奉旨後又不卽赴勝保軍營其爲有恃不恐可知汪曜奎所辦捐輸託名於潁州分局其實攜帶空白部照實收赴潁州攬捐其攬捐之法則係前任河南藩司賈臻平空提出餉票五萬兩作爲勝保軍營賞號勝保交汪曜奎帶赴潁州銷售代人上捐不用軍營書吏由汪曜奎自募人役以便舞弊每票百兩汪曜奎包繳勝保銀二十三兩約共銀一萬一千兩並無分毫發給兵勇試問歸於何用耶汪曜奎被參後不知避往何處幸蒙 聖明垂照於勝保奏報中知在該營飭令催調來皖眼同結算旋由勝保與 臣疊次咨函無非曲爲開脫不料勝保下與屬員串通卑污不堪至此軍營保舉原以論功行賞勝保無一不拜門生所收費敬按官階以爲多寡皆知其數習以爲常恬不爲怪糧臺出入絲毫均關報銷勝保設立雜支局無物不備糜費浮於正項此其貪墨之大

概也其所到之處攜帶婦女廣招娼妓醜聲至不可聞九年夏閒駐軍盱眙有知府倪元灝買婢女二人送至勝保船上勝保復居盱眙之江家花園令該縣知縣許垣逐日密招歌妓送至園中荒淫無度軍心渙散而盱眙不守後至河南山東人言藉藉此次由豫入皖至陳州卽攜妓數人隨行到潁州又添數人皆知縣李連芳一手爲之逆賊張澂之妾勝保認爲義女並爲請四品封典營中文武無不笑之苗練誘擒狗逆獲有賊婦勝保向苗沛霖索取苗沛霖不與遠近傳爲笑柄近又聞其委員秦姓由揚州買婢女數人送往潁州此其荒淫之大概也然使其長於用兵果有非常戰績猶可略短取長否則與各路統帥和衷共濟事事顧全大局亦可用其功而原其過乃此次援潁爲賊所困幾於全軍盡覆賴茨河鋪等處團練鄧林怡等帶練助剿轉敗爲勝楚師又攻賊於

潁州之南圍城之賊全力抗拒南路後爲楚師所敗因糧盡分股
撤退潁州始行解圍勝保遂鋪張揚厲攘爲己功殆不知人間復
有廉恥李續宜志向忠純勝保因其與苗沛霖爲仇而極力詆毀
之賈臻之紕繆無能勝保因其鑽謀逢迎而極力掄揚之其種種
悖謬任性妄爲有不可枚舉者如我皇上以事關重大必須澈
底根究以儆貪邪請將臣此片密交曾國藩確切查訪覆奏當知
臣無一字虛誣 上諭議政王軍機大臣等袁甲三奏粵匪糾合
大股力爭石埠橋要隘經李世忠調派援軍水陸夾擊賊眾退敗
一摺石埠橋爲金陵東北屏蔽此次偽護逆晝夜攻撲勢甚兇猛
李世忠將東陽龍潭各軍撤併堵剿並調派援軍分投渡江竟能
以少擊眾轉危爲安鎮定有爲殊堪嘉尚惟金陵城大賊眾見在
僞忠逆糾合大股前往援救石埠橋等處爲南路要隘賊所必爭

難保不去而復來仍著袁甲三飭令李世忠嚴密防堵先爲自固之謀庶可相機進取並著曾國藩妥籌兼顧隨時分兵策應毋令已爲我據之險稍有疏虞至金陵逆勢未衰曾國藩函致袁甲三所稱先剪旁近州縣或兩路攻取東壩常州徐圖合圍之議尤屬切中兵機卽著與都興阿等妥速會商慎籌一切進止機宜以期必勝至各路援賊一經戰敗難保不鋌而走險江北地方完善港汊紛歧曾國藩都興阿務須恪遵歷次諭旨力籌守禦裏下河一帶兵力空虛亦應加意毋稍疏懈袁甲三另片奏臨淮兩路剿匪情形覽奏均悉卽著飭令吳秀徐鵬等節節進剿次第掃蕩其花莊任橋一帶捻匪乞降尤須辨別真偽不得率行招撫致貽後患通匪副將張威邦前有旨令解赴曾國藩軍營審訊茲據袁甲三奏張威邦行抵全椒縣境病故該革員是否患病身死抑係畏罪

自盡有無別項情節並著曾國藩查明具奏袁甲三奏金安清經手捐款輻輳不清供詞含混汪曜奎延不到營請交曾國藩查辦等語卽著曾國藩咨提金安清汪曜奎到營秉公查辦徹底根究以免懸宕而杜弊混將此由六百里各諭令知之○諭袁甲三奏道員經手捐項請交曾國藩查辦一摺汪曜奎旣與金安清有借用捐照交涉且疊經有旨飭赴袁甲三軍營聽候辦理勝保自應遵照卽行飭赴臨淮清算乃勝保與袁甲三信函以汪曜奎所稟與金安清所呈親供底稿均稱並無交涉卽云不必往返而金安清在袁甲三營所遞親供勝保營內先有底稿其情弊更屬顯然及袁甲三函覆勝保將汪曜奎經手捐項清結咨辦又未據勝保咨覆僅據汪曜奎稟出有徐丹桂等經手款項勝保從前委汪曜奎勸捐並無徐丹桂等分辦之案今該員乃以承吏遺漏具稟顯

係以故員搪塞冀掩其短且該員所領實收部照以見稟開除計之數亦不符汪曜奎以疊次奉旨飭赴臨淮之員既不遵調前往而又愆愆勝保札調袁甲三所管轄之潁州捐局案卷自行結算其爲希圖掩蓋彌縫尤屬顯而易見勝保以奉旨查辦之員延不飭赴袁甲三軍營且爲之奏請謂非瞻徇屬員其誰信之本日已將汪曜奎改交曾國藩查辦著勝保卽飭該員迅速前往如敢再行藉詞延宕當卽降旨將汪曜奎嚴拏解交懲辦決不寬貸將此由六百里諭令知之○諭韓超田興恕奏粵匪由川入黔經官軍擊敗餘匪復竄川境一摺石逆前由黔境竄入川省逼近敘郡曾據駱秉章奏稱已派遣員曾傳理等分投截剿韓超等復飭總兵吳安康督隊追剿卽著駱秉章等嚴飭曾傳理等會合夾擊該逆勢雖窮蹙而到處勾結附和屢爲川黔之害若不先除此股則川

省大軍爲所牽掣難以兼顧他處務當乘此機會迅速殲除不可再任蔓延韓超另摺奏滇練林自清分起欲由水城畢節入川經總兵李有恆等擊退並將分由水城之滇練擒斬八十餘人餘練挑畱七百名所餘六百名酌給盤費路票令其回滇林自清因黔防嚴緊亦卽帶隊折回鎮雄等語林自清所部練眾膽敢不遵諭旨闖入黔境開放槍礮實與叛逆無異韓超卽遵旨轟擊令其折回鎮雄辦理頗合機宜惟該練眾素無紀律該署撫挑畱之七百名務當隨時察看儻有滋擾情事必當悉數正法斷不可稍存姑息前據張亮基奏林自清已由納溪至瀘州委員馳往辦理而此次韓超奏稱由黔折回鎮雄該練何由徑達瀘州著駱秉章卽遵疊次諭旨飭令回滇儻抗違不遵卽令熊煥章迅速攻剿毋稍瞻顧並著潘鐸張亮基遵照前旨諭令前赴大理剿賊斷不准以堵

勦川滇邊界爲詞任其逗遛肆擾儻或林自清別滋事端惟該署督等是問見在該練雖經折回難保不乘虛再行窺伺著韓超田興恕妥爲防範以保黔境將此由六百里各諭令知之○辛未諭內閣吏部奏遵議侍郎增慶處分一摺據稱理藩院侍郎增慶於神機營應領薪水等項銀兩含混造冊殊屬疏忽請照例議以降一級調用毋庸查級議抵等語增慶著革去理藩院侍郎毋庸管理神機營事務仍畱副都統並一切差使○壬申諭議政王軍機大臣等鄭元善奏官軍連克賊巢三處進擣平興並調兵勇截勦宛境竄匪一摺汝營官軍兩日之間連將二王樓郭莊賈寨三處賊巢攻拔見在乘勝進擣平興事機頗爲順利卽著鄭元善飭令張曜迅圖攻拔毋稍延緩此次豫軍正在得手之際務當乘此聲威將首匪陳大澹等殲除並著派兵會合楚豫各軍將附近著名

匪寨痛加勦洗其被脅各圩仍當勦撫兼施酌量解散以期及早肅清至西路回竄股匪擾及葉裕其前陷鄖西之賊亦擾及淅川廳之戴家河一帶距荆子關僅數十里該匪三路環逼窺伺宛城鄭元善見飭參將盧得勝統帶駐洛之師由汝郊進勦並令援洛之剛銳三營改道襄葉探蹤勦擊復商由勝保派撥馬隊千名會合知縣王珠煒所帶勇隊併力兜擊又由毛昶熙撥兵千名馳赴裕州辦理尙爲周密著勝保鄭元善毛昶熙嚴飭各軍迅速會勦並著官文嚴樹森飭令前赴信陽一帶助勦之道員歐陽正墉副將周鳳山所部兵勇四面兜擊以期一鼓殲除如歐陽正墉等兵力尙單並著官文嚴樹森迅速添兵往助以固邊圉至由鄖西竄近荆子關股匪難保不與宛境各股併聚西擾陝疆北窺河洛鄭元善見已飛咨多隆阿援秦之師取道宛城與豫軍兩面夾擊見

在既有歐陽正墉等軍會剿則多隆阿應仍前赴陝省進剿回匪
先其所急見在陝省回匪圍攻同州並偏近省城滋擾非速行剿
辦陝事幾不可問前經疊諭官文多隆阿飭令雷正綰迅速赴秦
此時尙無到陝信息實屬任意遲緩著官文嚴行飭催如有意逗
遛卽行參辦多隆阿見在行抵何處如已行近陝境卽著徑行前
進不可爲宛城股匪牽掣前諭勝保統率全軍馳赴河洛此時豫
省西路情形緊要著卽迅速前進毋得遲回觀望致誤事機鄭元
善另片奏袁懷忠見無蹤迹等語袁懷忠習染油滑難保不潛匿
豫境著鄭元善查明飭令赴皖毋許逗遛其所部游勇斷不可任
今在光州一帶潛留務當速行解散以靖地方將此由六百里各
諭令知之○以恆祺爲理藩院右侍郎由內閣學士遷○癸酉諭內閣大
學士桂良志慮忠純器量淵粹渥承 四朝知遇由部曹外任道

府存陟封圻歷任都統將軍蒙 文宗顯皇帝優加擢用由直隸
總督府登揆席並令來京供職總理部旗事務朕御極之初蒙我
兩宮 皇太后任用耆臣重加倚畀特授爲軍機大臣與議政王
等夙夜在公商推庶務用資輔弼方冀遐齡克享恩眷長承迺因
偶染時疴遽爾溘逝遺章披覽猶復惓惓於用人行政語不及私
其忠愛之忱閱之尤堪墮淚著賞給陀羅經被派醇親王帶領侍
衛十員卽日前往奠醑加恩晉贈太傅照大學士例賜卹入祀賢
良祠賞給廣儲司銀一千兩治喪任內一切處分悉予開復應得
卹典該衙門察例具奏伊子孫俟百日孝滿後並著該旗帶領引
見用示篤眷忠盡至意尋予祭葬諡文端○諭議政王軍機大臣
等據滿慶等奏稱喀徵呼圖克圖稟稱布賚綳寺所聚人等向惜
德寺擲石隨於附近該寺各廟宇房屋放槍而商屬僧俗亦以喀

徵喇嘛居心叛逆達賴喇嘛合藏僧俗均聲稱要將喀徵及此案串謀主使之人一同掃滅等情經滿慶等分飭兩造不得妄肆惟當靜候諭旨辦理兩造藐不聽信商屬僧俗竟從布達拉山軍械庫內取出礮位藥鉛調集前後藏江孜番營官兵藥鉛所屬百姓等將惜德寺圍攻因惜德寺竭力守禦殺斃商屬僧俗兵民不少喀徵呼圖克圖忿極擬調果洛克野番來藏助戰雖是否聽從尙難逆料惟西藏係達賴喇嘛住紮處所西南北三面均與外番毗連該僧俗等同室操戈不受漢官約束經滿慶等面屬薩迦喇嘛向兩造勸解並札調已辭噶布倫汪曲結布來藏理說而兩造皆知防兵人少藏臺餉乏肆行無忌以致藏中漢兵漢民俱恐誤遭殺害懇飭由川委員管帶文武官員兵丁數百名及應用餉銀軍火兼程來藏彈壓審辦等語著駱秉章由川酌調妥幹文武官數

員及兵丁數百名探明景紋行抵何處卽交管帶赴藏以資彈壓
若因川省見在有事且距藏路途稍遠卽咨行景紋酌調達木蒙
古官兵及夥爾三十九族番兵交其統帶赴藏彈壓務使兩造畏
服聽斷至此事滿慶等前派慧能喀徵呼圖克圖掌辦商上事務
有無情弊商屬僧俗均與不治何由起釁該督見聞較確著詳細
查明具奏並將如何籌辦之處會商景紋爲要將此由五百里諭
令知之○甲戌諭內閣軍興以來百姓顛沛流離慘遭荼毒朝廷
憫念民艱命將出師除暴戡亂更以脅從罔治之意詔諭各路將
帥至再至三原期該統兵大臣等咸體此意以出斯民於水火近
聞江浙等省被脅難民有乘閒逃出者兵勇見其頭髮稍長或面
有刺字不由分辯奪其所有殺以冒功帶兵員弁率以掄斬髮逆
呈報冀邀獎敘以致身陷賊壘者僉謂不散尙可苟延逃出反以

速死遂激成從逆之心而不悔是吾民既死於賊又死於兵痛孰甚焉又況賊匪所踞之地不許百姓薙髮歷時既久狀同髮賊更有被倡勉從作爲軍帥旅帥等名目陽代賊匪徵求供給陰以保衛鄉閭希冀賊不親往蹂躪及被賊擄去迫令前驅以攫鋒鏑者此等情形實堪矜憫著各路統兵大臣出示曉諭兵勇凡遇被脅逃出之難民苟查無兇器及可疑情迹卽告知本管官令其薙髮回家或由地方官遞送回籍其無籍可歸者並著妥爲安置卽或迹涉可疑亦必解送大營訊明妥辦如有搶奪財物私行殺害卽按軍法從事本管官不行查辦一經查出立卽從嚴參辦庶被脅者有生還之樂聞風者深歸向之忱見在各路官兵攻剿江浙兩省兵威甚盛正斯民自拔來歸出水火而登衽席之日著江浙各督撫刊刻謄黃在賊氛附近之處各路張貼徧行曉諭凡裹脅難

民除甘心從逆爲賊畫策者殺無赦或隨賊打仗抗拒官兵不能及早反正將來克復城池悉行剿殺外其餘一切爲賊所陷者概予免罪如能立功自效並准酌給獎勵以示覆幬生成咸與維新至意○諭議政王軍機大臣等前因丁潮臣糾黨屯聚諭令袁甲三剿辦茲據勝保奏該大臣未蒞皖境卽據袁甲三函稱金馬胡人眾滋事當派兵剿辦嗣勝保飭苗沛霖將金馬胡人眾撤回時袁甲三業已派隊進攻乘其人眾遠出襲破該練圩數處丁潮臣屢次乞假回圩苗沛霖未允而臨淮之兵攻剿日急該練因家室破亡咸懷憤激悉眾譁歸二萬餘人一旦乘怒而去勢不至很鬪不止丁潮臣本非苗練舊部見旣奉調剿賊卽不能不量從寬宥等語丁潮臣本係李相臣圩內逸出著名巨捻雖據勝保奏稱已歸苗沛霖調出隨軍剿賊然其人數眾多且倚勢滋事袁甲三亦

豈能置之不辦日前袁甲三因病奏請開缺未經允准今據勝保奏稱軍務皆委袁保恆張學醇辦理所言雖未必確實亦未便再令辦理此事所有金馬胡練眾卽著李續宜察看情形秉公辦理勿使反側之徒藉口滋擾將此由六百里諭令知之○諭勝保奏統籌皖豫情形並歷陳袁甲三辦理丁潮臣一案輕重失宜各摺片覽奏均悉前因逆匪由潼關東竄豫省情形喫重疊經諭令勝保統率所部馳赴河洛相機剿辦茲據勝保奏大兵俱動則太和一帶門戶洞開該逆必四出蔓延勢將不勝防剿見擬察看情形親督大隊赴項城周口一帶視賊所向迎頭截剿各等語近日河洛雖無賊蹤惟該郡居天下之中關係中原大局況陝省回匪乘機竊發而鄖西之賊竄近荆子關經鄭元善調派各軍由宛城進剿難保不偪回陝省擾及潼關自應於河洛駐紮重兵俾秦豫兩

省得以隨時策應勝保所統馬步各隊頗多勁旅豈可株守太和城內靜待賊來著仍遵前旨迅督大隊馳赴河洛擇要駐紮毋再遷延蔣凝學督軍穎郡足資鎮守該大臣如慮太和防禦空虛卽將黃元吉畱穎之兵調赴太和助守其盧泰管帶之兵勇五百名勝保派赴正陽關爲彈壓釐局起見以區區一釐局而必須五百人防範恐所抽之稅不敷養兵之用於軍餉殊無裨益此項兵勇並著勝保調回太和交黃元吉管帶以厚兵力該大臣如慮正陽一帶匪徒滋擾河道難以疏通卽著咨會李續宜督兵進剿併力殲除勿畱遺孽將此由六百里諭令知之○諭薛煥奏比利時國通商立約已將大致議定將條約開單呈覽比利時國使臣包禮士願望過奢經薛煥率領吳煦薛書堂悉心籌辦剛柔互用甚爲得體見議條約所稱各口派委領事駐紮照各國一體貿易及商

民違約各情均照各國章程辦理三款並議定在上海換約俱屬妥協其用寶一款尙係該國心存仰慕於體制亦無違礙並可允准見在大致業已議定自當簡捷辦理著薛煥飭吳煦等令其自行趕緊繕出外國文字早日畫押將此由六百里諭令知之○諭常清景廉奏遵查阿勒坦沙拉父子下落並將咨俄國文及俄文鈔錄呈覽一摺阿勒坦沙拉父子既據俄國文稱係該國屬下人自稱素勒坦等語則其久居俄國已無疑義惟景廉於十年冬間奏稱咸豐五六兩年阿勒坦沙拉遣子扎哈拉邁特兩次來遞馬匹並據庫布頂供其呈遞回字尙自稱汗且攜伊父襲爵敕書求見是阿勒坦沙拉於咸豐五六年間尙爲哈薩克汗何以此次俄文內稱一千七百三十八年哈薩克阿布賴汗及所屬民人已經盟誓歸順永爲屬下見在俄國係一千八百六十二年距一千七

百三十八年計一百餘年是阿勒坦沙拉之祖父已服屬俄國且阿勒坦沙拉於咸豐五六年間尙自稱汗而俄文內稱哈薩克內早將此爵裁除是俄國儼然以哈薩克爲伊所屬之地細閱俄文內稱今欲復立不爲要緊雖阿勒坦沙拉時往貴國疆界站居自稱汗爵及回俄國待如親戚等語是阿勒坦沙拉在中國所屬則稱汗而在俄國則爲屬下其首鼠兩端情殊詭譎著常清明緒景廉將所指出各情逐一查訪實在情形酌量辦理儻阿勒坦沙拉早已服屬俄國自未便再令襲汗而綽坦既係冒襲亦未便徑令承襲必得飭令哈薩克各台官公舉一應襲汗爵之人奏請承襲方可永遠相安著常清等悉心妥籌務爲久遠之計不得將就了事哈薩克地接俄界久爲該國所窺伺所舉襲爵之人必係哈薩克本部民人所信服者藉以宣示朝廷之恩始不至爲他人誘惑

侵占明緒見在會勘地界尤當隨時防範至此次俄文阿勒坦沙

拉父子是

名與聞抑係俄羅斯造作之詞並著密派委員探詢明

確事關

屬夷襲爵且與俄國交涉該將軍等總當格外鄭重毋得

稍有

含混其英秀等情弊多端務須迅速訊結斷不可稍有不實

不

盡致哈薩克民人有所藉口也將此由六百里各諭令知之○

申嚴失守城池律○乙亥諭議政王軍機大臣等譚廷襄奏遵籌
出省督勦兗沂幅教各匪並南捻竄擾滕嶧邊界分投堵擊一摺
此次南捻由銅山竄至嶧縣之澗頭集經德楞額分隊堵禦該捻
不能搶渡向東逃竄而滕縣夏鎮復有另股捻逆竄至譚廷襄已
咨扎隆武等前往堵禦卽著該撫傳諭德楞額扎隆武實力堵勦
毋任闖入該逆由南竄入東境必道經徐州田在田督兵駐紮防
堵逆捻北竄是其專責何以任聽闖入該總兵所司何事見在捻

逆已偪入江南境內著田在田迅速帶隊會同東省之兵悉數剿除儻再任闖入東境必治該總兵以縱寇之罪吳棠前派兵越境赴蘭山協剿高歸一股頗能不分畛域此次南捻尙在江境務當派兵會同田在田之軍分投迎剿免致南竄譚廷襄著卽將緊要公事料理前赴兗沂駐紮調度各軍務當虛衷講求不得稍存己見致屬員得以逢迎揣摩有誤事機東省南路兵勇單弱僧格林沁見駐夏邑相距徐郡較近能否酌撥馬步將北竄捻逆會同田在田剿除淨盡著酌量情形妥籌辦理正在寄諭聞據田在田馳奏督軍進攻雷單等圩並西捻伺隙紛出督隊迎剿一摺見在該總兵進攻西路捻匪雖尙得手而東竄另股捻逆尙未擊退本日據譚廷襄奏報情形仍在徐兗交界肆擾自應先其所急將東竄捻逆剿除再行進剿宿西不得以直擣老巢爲詞轉令逸匪肆擾

吳棠之軍已至邳宿等處尤可乘機會合夾擊該總兵務當實心
攻剿不准稍存巧卸前據袁甲三奏已遵旨派撥兵勇赴清淮一
帶助剿仍著吳棠知照袁甲三多撥兵勇會剿以收夾擊之效將
此由六百里各諭令知之○嚴諭文煜等緝拏直隸馬賊○丙子
諭內閣慶端奏官軍克復青田縣城等語青田縣城被大股逆匪
竄踞經該督諭令團董何東泮管帶礮船駛赴攻剿已革知縣高
樑材集團助剿復經總兵秦如虎派兵進擊青田縣知縣吳兆祥
外委黃廷揚等率團行抵水南與賊接仗獲勝各路兵勇鄉團直
薄城根分門圍攻吳兆祥等率勇由東門架梯直上典史湯廷桂
亦一擁登城該逆由西門竄去當將縣城克復仍著慶端檄飭各
路兵勇乘此聲威分路進取規復處州郡縣各城迅掃逆氛○諭
議政王軍機大臣等慶端奏甯波等處郡屬縣五城一律克復見

籌恢復紹興一摺見在溫台兩郡業已肅清景甯雲和之賊亦經
竄回處郡浙省軍務漸有轉機正宜乘勝進取以期殄滅賊氛見
據探報紹興府之新昌縣已爲天台民團越境攻克卽著慶端左
宗棠查明確實情形具奏並著飭令溫台甯波各郡官紳激勵民
團迅將紹郡各城攻克仍飭總兵秦如虎督兵進規處郡會同總
兵林文察一軍速將處州城池攻拔以圖進攻金華爲節節掃蕩
之計左宗棠駐軍衢郡日久未見奏報見在攻剿情形如何著卽
迅速具奏以慰廑念該撫身任疆寄浙省全局皆宜統籌不得專
顧衢郡一隅此時浙東賊勢已蹙該撫正宜乘機進剿使浙東西
各路賊匪不暇兼顧自易得手並著嚴催劉培元蔣益澧各軍迅
速赴浙以厚兵力至甯波克復諸城風聞多係民團之力若令該
失守地方文武各員將民團勞績攘爲己有爲開復罪名地步該

民團出力之處反被掩抑何以激勵將來著慶端左宗棠確切查明據實保奏其溫台一帶出力民團並著一體查明彙保以收人心而資鼓舞至陳世章張景渠均係革職拏問之員所犯情節較重據慶端奏見飭該員等恢復紹興並稱克復甯波等郡縣係據該革員等稟報無非欲以收復浙省各城之功歸諸該革員等或將其名附入出力兵團摺內爲該革員等開復地步所請斷不准行著左宗棠仍遵前旨將陳世章張景渠嚴行審訊按律定擬具奏紹興府等城仍著慶端左宗棠乘機迅派賢員激勵民團力圖克復將此由六百里各諭令知之○丁丑僧格林沁奏苗沛霖從前帶練勦賊未嘗無功然恃功桀驁亦所不免地方帶兵各員既未能實力勦賊又復妄報戰功鋪張粉飾不足以服眾心苗沛霖因此藐視官長漸難控制前間有句通粵逆之事觀此次歸正後

卽能擒獲陳逆解往勝保軍營是苗沛霖與粵逆業已結讐或可
不至再行反側復查苗沛霖未歸正時南捻無所牽制遂恣意北
竄臣統軍屢次截剿將及二年今始辦到永毫刻下江北未靖尙
須用以牽制諸捻不得不暫示羈縻至苗沛霖自擒陳逆後蒙恩
予以自新見在情形是否馴順臣相隔寫遠未悉其詳見已咨行
安徽巡撫李續宜詳細確查俟咨覆到日再行據實具奏臣前接
勝保函稱苗沛霖歸正以來其報國之念出自至誠特楚軍成見
未化時有掣肘之嫌見在竄陝之賊又肆鴟張欲行西援誠恐一
經分身苗練楚軍勢必又生決裂欲歸臣駕馭當經函覆該大臣
以皖撫李續宜亦係顧全大局之人苗練果能真心效力楚軍必
不至與之爭鬪仍令該侍郎就近調和虚心共濟該侍郎復遣人
到營代苗沛霖呈遞稟詞大意係剖辨已往事迹查袁甲三李續

宜均身任封圻豈不能容一苗沛霖該大臣等意見不合應請旨
諄飭勝保袁甲三李續宜務當和衷共濟以軍務大局爲要就見
在時勢而論臣駐紮夏邑距皖南較遠李續宜駕馭苗沛霖能否
得宜尙未可知此時既無把握勝保一軍似未便遽撤再臣所統
馬步數千名將來節節進剿實有兼顧不遑之勢見在勝保袁甲
三李續宜鄭元善毛昶熙各路馬步兵勇又兼收復苗沛霖練眾
合之可有數萬一俟秋高氣爽亦應由西南兩路並進相應請旨
嚴飭該大臣等屆時督兵實力進剿江北一帶可期及早肅清
上諭議政王軍機大臣等據僧格林沁密覆軍務情形一摺內稱
苗沛霖之桀驁由從前地方官辦理不善今既擒解陳逆恩准免
罪須用以牽制諸捻不可不善爲駕馭各等語持論平允與節次
諭旨均相脗合至苗沛霖所遞稟詞內以著名逆黨丁潮臣爲歸

正之練且謂袁甲三李續宜合謀攻勦則全係一面之詞勝保之於苗沛霖以事事遷就爲撫李續宜有欲鈐制該練之意據奏亦未嘗一意主勦似所辦亦合機宜惟勝保與李續宜各存成見積不相能且勝保以苗沛霖之好惡爲好惡更難期其與李續宜浹洽疊經諭以和衷共濟終覺意見未融袁甲三前經因病乞退本擬移交李續宜接辦因恐該撫未能兼顧業經密寄詢問一俟覆到卽可將袁甲三撤回其欽差大臣擬卽一併裁撤所部之兵併歸李續宜派員統帶以一事權苗沛霖固應議撫惟勝保迹近受制辦理含糊甚不可恃若任其久畱皖省必致大局掣肘前經寄諭李續宜令其持平覈議見在尙未覆奏暫示羈縻勝保亦不能卽撤而日久究不能不撤旣撤以後李續宜坐鎮於南北路卽不可無控制之兵屆時惟有將勝保之眾併歸該大臣接統與李續

宜籌商撫馭之策方能和衷共濟迅圖蕩平僧格林沁素以大局爲重必當深諒朝廷不得已之心也該大臣既咨行李續宜詢以南路軍務一俟李續宜覆到其能否駕馭苗沛霖著察看情形迅速馳奏奏到後再定辦法毋稍稽遲將此由六百里密諭知之○諭僧格林沁奏進剿捻圩收復賊寨並追剿東竄捻匪督剿棍匪各情形一摺永城所屬之韓家集車家集均經僧格林沁派兵攻剿收復被脅之劉家集等十六寨均行歸正復派隊至陳家官莊等各寨並宿州之鐵佛寺寨等處先後收復永城之胡家寨寨長亦將擒首斬首呈獻丈八集踞匪聞風南竄復出隊渡滄河以南將趙浩然等黨匪擒斬百餘名滄河迤北賊圩所贖無多其進攻亳州各隊見亦會同毛昶熙所派勇隊進剿盧廟賊圩事機頗爲順利著卽乘此聲威迅將永亳賊圩剿撫兼施以期及早肅清至

匪首李城等股匪見已竄至蕭縣王廣繼等股匪由徐州向東奔竄無非欲牽掣官軍藉爲圩賊緩被攻圍之計該大臣已派翼長蘇克金等帶領馬隊赴徐會剿該匪分股竄向夏鎮德楞額剿辦蘭嶧根匪已將卓山茨黎崗各寨焚毀因而捻竄至銅山縣境復率兵勇分防運河將竄至三灣之賊擊退前據譚廷襄奏捻匪由銅山竄至嶧縣滕縣復有另捻竄至夏鎮並據田在田奏西捻伺隙東竄與該大臣見奏情形大略相同當卽諭令該大臣並譚廷襄田在田吳棠合力會剿並因東省南路兵勇單弱復諭僧格林沁酌派馬步會同田在田將北竄捻匪於徐郡剿除淨盡見在譚廷襄卽日出省赴兗州一帶防剿卽著僧格林沁飭令蘇克金等馳赴滕嶧與東省兵勇會剿並飭蘇克金等聽候譚廷襄調度一面知照譚廷襄辦理其由三灣折向東竄之賊亦卽飭令德楞額

會同吳棠迅速剿除毋稍蔓延爲患陝省弁兵旣屬無可裁撤卽著仍畱該大臣營內以資攻剿田在田屢次被人參奏如果不能得力該大臣卽一面奏聞一面另派得力之員前往接辦以便卽將該總兵撤退此事關繫大局於該大臣軍營後路亦有裨益毋稍遲緩將此由六百里諭令知之○丁丑李鴻章奏自虹橋泗涇大股賊匪敗遁浦西附近各處均暫安堵青浦嘉定仍有悍賊分守臣飭參將程學啟等乘勝襲攻青浦適陰雨兼旬湖河盛漲無路可進應再厚集兵力徐圖進取至浦東一帶經知府潘鼎新都司劉銘傳收復南匯川沙後督同投誠勇目吳建瀛等於五月十一日攻復奉賢縣城潘鼎新劉銘傳進紮該縣派劉玉林所部千人進紮柘林探知逆眾盤踞金山衛聯營數十里以阻我師五月二十八日潘鼎新飭令劉玉林帶隊進攻是夜初更出其不意分

路劫營二更行抵漕涇當令哨勇四面埋伏號礮一響我兵大呼掩殺該逆紛紛驚竄登時燒毀賊營三座殺斃及踐踏落水死者不計其數劉玉林連夜帶隊追擊三十餘里至金山衛城將東北門外賊營盡行踏毀該逆入城堅守連日探聞金山衛踞逆以大股屯於西路二十餘里相爲犄角又由浙江添賊數千冀圖合股再逞劉玉林等派隊進剿疊獲小勝臣查浦東數百里之地漸就肅清惟金山衛一城爲江浙毗連要隘必須速圖攻克以重兵屯守庶柘奉川南各廳縣門戶可保上海松江對面局勢亦寬因飭潘鼎新劉銘傳均紮營漕涇由海塘進東北一路並調副將華爾帶常勝軍千人同參將李恆嵩由張堰進西南一路會攻金山衛城又調參將覃聯陞帶勇進紮奉賢爲後路援應 上諭李鴻章奏進剿浦東獲勝並察看前敵水營廣勇近日上海情形各摺片

著李鴻章詳慎進兵妥爲辦理務期浦東早日肅清另片奏洋兵不守青浦嘉定實因力不能支並未焚毀見尙爲賊堅踞探悉英國有兵萬餘來滬止在上海百里內攻剿不便遠征我兵難與之強合黃翼升業經有旨署理江南提督曾秉忠所部廣勇旣劣船亦脆薄卽著李鴻章與黃翼升設法整頓並催令曾秉忠迅往曾國藩軍營毋任逗留其水路各營應如何布置卽與黃翼升妥爲調度此外上海陸路兵勇亦多不成紀律著李鴻章一律整飭簡汰俾歸實用毋稍瞻徇將此由六百里諭令知之○命直隸奉天清查黑地升科○予貴州陣亡知府周夔等建祠○戊寅諭內閣山西按察使瑞昌候選道沈巢生並伊子山西候補知府沈長材見有查辦案件均著暫行革職聽候查辦○諭議政王軍機大臣等愛仁王茂蔭奏請將臬司瑞昌等革職查辦一招瑞昌沈巢生

等平時劣蹟愛仁等見亦有所聞是其被參各款必確有可據惟業將該臬司等革職查辦難保該員等不聞風儆懼設法彌縫愛仁王茂蔭計日可抵晉省著卽將瑞昌等參款嚴切根究毋任諱飾其餘被參各員著一併密速訪查斷不可任令貪劣之員得售其狡展幹旋之術本日又有人奏陝省大吏縱匪殃民一摺據稱陝省漢回仇殺推其禍原由已革巡撫曾望顏任性妄爲信任首府沈壽嵩將各屬漢回械鬪傷斃多命之案彌縫諱匿所致迨瑛榮到任一味見好屬員置民事於不問粵捻竄近陝境並不嚴飭鎮道將弁扼險固守以致廳縣相繼失陷又復以賊眾兵單等詞代提督孔廣順奏請寬免處分刻下回匪攻圍同州逼近省垣四門外焚掠一空該撫始終閉門坐視並無一人一兵出城援救等語愛仁王茂蔭本係赴陝省查辦事件著將晉省參案辦竣後卽

行馳赴陝西將此摺指參各節彙入應行查辦各件內一併確切查明具奏毋稍徇隱原摺著鈔給閱看將此諭令知之○以王榕吉爲山西按察使由直隸大順廣道遷○己卯駱秉章奏石逆自涪州敗竄詢知我軍倍道回顧重慶該逆不敢窺伺遂由山徑橫竄其零股三千餘人由南川境內急趨貴州桐梓一帶石逆則擁眾數萬圍攻綦江縣城知縣楊銘率眾登陴固守該逆晝夜環攻楊銘之弟楊鏢親督練勇堵禦悍賊百人緣梯而上突將楊鏢砍傷殞命楊銘見勢危急督勇奮擊立將登城之賊殲斃礮石雨下城下之賊傷斃甚多不敢繼登遂併力挖掘地道意圖轟城維時知府唐炯已率黔勇追至紮營老瀛山與賊對壘知城圍甚急先攻石佛岡以通東門遂於四月初十日分隊進攻遙聞城內礮聲不絕該逆已於十一日將南門轟陷十餘丈幸城內先掘內濠並築土垣知

縣楊銘等親督團勇據住內牆槍礮環擊練勇越濠血戰賊不能
進此時唐炯已督隊由白塔直攻石佛岡搶斷浮橋乘勢焚燒賊
營復派通判李忠清等督勇由下游渡河分赴南北兩門截擊城
內團練奮勇殺出前後夾擊賊勢披靡城圍立解道員曾傳理率
果毅營先期馳駐合江以扼上竄瀘州之路臬司劉嶽昭率果後
營豫紮江津之先市場以備迎擊總兵唐友耕亦由重慶馳至與
唐炯合隊跟追該逆既難回竄悉數繞赴貴州仁懷境內由山徑
潛行以出敘永廳占踞廢城經代辦敘永廳同知劉廷楠等督飭
兵勇悉力堵禦該逆遂於二十八日向興文奔竄維時股匪張逆
圍攻江安道員曾傳理由藍田壩急趨江安張逆聞風解圍先遁
迎投髮逆併力攻陷長甯縣城勢將出安甯橋仍圖竄擾江安臬
司劉嶽昭派營馳扼安甯橋迎擊復派三營奮勇齊進賊不能支

追斬無算總兵唐友耕知府唐炯亦從興文轉戰而前將後隊餘匪掃蕩聯營進扼曹村口竹洞水兩處要隘賊既不得逞於東北遂分股竄至珙縣等處道員曾傳理等先期馳至敘郡該逆踞巡檢寺堅築營壘分股擾及桂花坳其沙河驛之賊已被劉嶽昭督率所部分道進攻斬擒不少餘賊竄併巡檢寺一處劉嶽昭進軍花灘以扼下竄敘州之路曾傳理直取桂花坳並移熊煥章一軍於復興場以圖合圍五月二十二日我軍甫至桂花坳賊卽擁眾萬餘人來撲我軍分投迎擊賊眾布滿山谷相持逾時都司劉鶴齡率親兵數十人衝入賊陣諸營隨進賊大奔潰我軍跟追將近巡檢寺劉鶴齡策馬陷陣身中矛傷曾傳理黃鼎率後隊馳救賊勢稍卻熊煥章由左路山梁壓下右路各營乘勢包鈔將賊衝爲兩段我軍先將大廟村賊壘焚毀賊遂大敗拌命奔入巡檢寺熊

煥章揮親兵衝入賊壘潘長清率眾繼之我軍四面並進復縱火焚其巢場外之賊悉皆鼠竄場內之賊焚斃殆盡我軍追殺十餘里沿途斬馘以千計餘賊翻山越澗遁回長甯分擾珙縣之賊亦被參將吳嘉春督勇擊退該逆於二十三日復以大股直撲曹村口竹洞水唐炯等扼住山梁唐友耕由曹村口峽中直前搏戰賊眾分路疊進層層包圍唐友耕受傷裹創下馬步戰勇氣百倍唐炯唐大有督隊左右衝擊賊勢已挫突出千餘人直趨山梁意圖攻撲營壘千總林光福揮兵迎敵千總唐友貴單騎突陣賊眾辟易守壘兵勇乘勝擁出礮斃及墜巖死者甚多曹村口賊匪紛紛敗潰而竹洞水一路之賊意欲似曹村口得勢合力以襲我軍李忠清等分隊伏於兩面山坡林箐之中以數十人誘賊漸入峽中伏兵突起兩面夾擊姜星明復率所部繞出賊後賊遂狂奔我軍

合隊追至石筍沿途賊屍枕藉兩路共斃賊二千餘名該逆仍退
回長甯六月初一日復出大股直撲唐友耕營盤該總兵整隊拒
敵該逆屢撲屢卻傷斃無數初二日唐大有等分隊出擊適劉嶽
昭派隊由安甯橋馳至內外合擊賊屍縱橫遍野共計殲斃四千
餘名追殺十餘里初六日曾傳理約會熊煥章分五路出隊先將
香鑪山玉黃場一帶賊卡埽平其洞底一處尤爲險要該逆併力
死拒各營乘勝進攻賊眾棄壘而遁劉嶽昭亦出隊將援賊截回
該逆屢經挫衄見在屬聚長甯以爲負隅前竄桐梓零股疊經黔
軍進擊不暇喘息由雲南鎮雄地界奔竄大壩瀘衛將由興文竄
合長甯巨股臣見已飭臬司劉嶽昭等三面偪圍迅圖克復長甯
縣城將該逆全股蹙之南面山中以期聚殲而除巨患 上諭內
閣石逆自涪州敗竄後擁眾數萬圍攻綦江縣城知縣楊銘率眾

固守其弟楊鏐督勇堵禦突被悍賊緣梯登城砍傷殞命知府唐炯率黔勇由石佛岡攻進立解城圍道員曾傳理率眾先駐合江扼賊上竄臬司劉嶽昭總兵唐友耕會同唐炯率隊跟追沿途截殺該逆圍攻永甯復經兵勇擊敗向興文奔竄其另股賊匪張逆圍攻江安因官軍由藍田壩急進遂聞風解圍先遁句結石逆攻陷長甯縣城經劉嶽昭等派隊迎擊追殺無算賊遂分竄珙縣及高縣之巡檢寺等處復經曾傳理馳剿將賊壘焚毀餘賊遁回長甯其分擾珙縣之賊亦被參將吳嘉春擊退曹村口竹洞水等處賊匪均經我軍兩路迎擊斃賊不計其數仍著駱秉章督飭唐友耕等乘勝進剿毋畱餘孽○諭議政王軍機大臣等吳棠奏清江南北兩岸土圩各工一律完竣繪圖呈覽並匪首高歸等投誠情形各摺片清江浦扼南北之衝其地向無城郭實不足以資戰守

此次吳棠相度地勢築建圩牆僅四閱月鉅工告成足見該署督辦事認真甚屬可嘉高歸等既屬真心反正且隨同官軍打仗出力自應准其投誠惟招撫一節流弊極多仍著吳棠飭令黃國瑞等隨時防範儼稍有翻覆卽當立予正法以絕後患至北竄捻股竄至邳境運河灘岸搶船偷渡雖經黃國瑞等督兵剿退而該逆未受大創見在金樓賊圩已破該逆懾於聲勢必折而東竄著吳棠飭令遊擊張從龍等督帶馬步千名迅速馳赴宿遷會合姚廣武黃國瑞等軍兩面夾擊其總兵黃開榜見帶礮船並著駛赴邳宿運河併力剿捻毋稍疏懈至海州匪首張殿標等業經剿滅境內已稱安堵惟探報捻首李城等股糾合三四萬人出巢聲言赴海沐一帶打糧該處防剿喫緊著僧格林沁飭令所派兵勇會同吳棠派出各軍迅速剿除毋令肆擾昨據勝保奏稱丁湖臣因臨

淮之兵攻勦日急該練悉眾譁歸約有二萬餘人等語該練眾既懷憤激勢必乘怒很鬪著袁甲三妥爲防勦不得稍有疏虞將此由六百里各諭令知之○諭前因張亮基奏滇練林自清已抵瀘州當經諭令駱秉章等妥籌辦理茲據奏稱林自清抵瀘後經地方官開導不肯回滇見帶練六百名赴重慶面見張亮基或有竟不能回滇之勢卽當酌籌款項俾資遣散僅畱林自清在川效力或酌畱數百人使管帶勦賊等語所籌尙屬周妥林自清帶練赴川沿途尙無騷擾並攜眷屬同行是其不爲回眾所容希圖在川勦賊覓食已可概見惟林自清練眾八千人所需口糧川省力難供給況其部眾半係烏合亦安用此素無紀律之練著駱秉章會商潘鐸張亮基妥爲遣散林自清或不肯回滇卽著駱秉章察看如果才尙可用准其畱川效力其部眾悉行遣回卽使林自清無

兵可帶亦止准挑畱數百名隨同官軍剿賊該練總係張亮基所
識拔之人見在重慶晤見如願隨該前督赴滇卽著帶同前往儻
林白清必欲赴省謁見駱秉章等務當曉以順逆禍福使知准其
畱川效力係屬格外恩施以後斷不可妄作妄爲自取咎戾若能
奮勉立功自當寬其既往一體獎敘以上各情駱秉章潘鐸張亮
基商定後卽行具奏毋稍延緩駱秉章另摺奏團練攻克天洋坪
見籌攻克八角寨及鶴遊坪等語八角寨地處險要李卯二逆旣
合爲一處恐其負隅固守勢成持久著該督嚴飭兵團並鶴遊坪
周曹二逆一併勒限殲除毋再遷延其石逆股匪見在川楚兵勇
分路會剿務當聚而殲旃毋致竄逸貽患他處著駱秉章傳諭在
事文武員弁奮力攻剿儻再任他竄必將該文武嚴行懲處若能
一鼓蕩平自可仰邀優獎也將此由六百里各諭令知之○三·四

川陣亡副將沈發祥等祭葬世職○庚辰諭議政王軍機大臣等
托明阿等奏回匪圍攻省城接仗情形並統籌全局持平辦理兼
催京兵赴陝助剿各摺片覽奏曷勝焦急逆回嘯聚渭河南北響
應日多並敢攻圍省城雖經官兵分路疊次擊退而困守孤城外
援不至東西北三路道路梗塞惟南路尙通文報省垣存兵單薄
不敷攻剿若再多延時日恐四面懸隔食用漸空大局更難設想
多隆阿一軍疊經諭令官文催令赴陝並催雷正綰帶兵先行往
援遷延多日俱無到秦消息是官文多隆阿並未以陝事爲急已
可概見此時陝省情形萬分喫緊著官文懍遵前旨嚴催多隆阿
雷正綰速行入陝儘遲遲前進貽誤陝省大局致令不可收拾恐
官文多隆阿不能當此重咎也成明一軍昨因蒲州被圍已諭令
該署提督統率全軍剋日渡河剿辦見據瑛棨奏同州百姓盼望

援師共知京兵見駐山西隔河望哭竟有因兵不救患數百人同日自盡者似此情形成明豈忍坐視著卽督率全軍渡河迅解蒲城之圍以期節節進剿與省城聲息聯絡毋許藉詞觀望致匪勢益成燎原並一面知照英桂迅撥精兵以壯後路聲援惟京兵僅止二千爲數甚單如多隆阿等軍不能繼進致令深入無援或有挫失惟多隆阿是問前諭多隆阿等不可偏聽紳民一面之言袒護回必須持平辦理因其時情形止於漢回互鬪此時回匪攻劫官劫畱官紳張芾等同州一帶逆回身著黃袍旗書逆語被擒不從之回卽遭焚殺是該回匪逆迹昭著斷無專主議撫之理多隆阿督兵抵陝後卽著先將該逆痛加剿除毋爲撫議所誤其被脅良回仍宜分別解散毋得概行誅殺以分順逆而定人心將此由六百里各諭令知之○辛巳以孟秋時享 太廟 上前期

親詣行禮○諭議政王軍機大臣等馮子材等奏遵籌防剿並漕撫各臣解濟鎮餉實在情形一摺據稱偽忠王李秀城等均在丹陽句容一帶調集死黨甚多其謀甚秘尙無舉動該提督等激勵士卒不時偵探與曾國荃等聯絡呼應隨宜戰守前者龍潭之役李世忠派兵渡江馮子材等接據探報委文龍德等赴援因賊氛綿互孤軍襲遠恐有挫失尙非藉詞折回自屬實在情形見在曾國荃等在上游布置聞已周妥但須水師攻克九洑洲鮑超一軍攻克甯國便可徐圖進取爲合圍之計鎮江爲南岸第一要緊門戶難保該逆等不鋌而走險抵死來爭馮子材等務須督飭在營將弁實力防剿並隨時稟請督臣曾國藩指授機宜以期萬全無失刻下上海喫重李鴻章未能赴鎮該提督等責無旁貸毋得稍涉大意致有疏虞鎮城防剿情形並首逆李秀城等密謀何事偵

探有無端倪均著隨時迅速具奏至所稱鎮營餉項積欠日多各處解濟之餉僅止三分之一等語見當軍餉支絀之時處處皆虞不足非於鎮江一營獨有偏枯該提督等惟當就見有之餉盡在營兵勇均勻散放仍隨時加意撫循以作士氣毋使帶兵員弁侵漁剋扣致兵丁有所藉口方爲不負委任另片奏蘇常等處被脅難民甚多遵奉曾國藩札飭在鎮江城外設局招撫並擬委前無錫縣知縣丁廷鸞前往丹陽等處密爲勸解設法招攜此事固屬目前最要之策然須屬令該員慎重前進相機而行未可稍涉大意中賊奸計反爲所乘上年八月薛煥及馮子材先後馳奏常郡團董汪本釗蘇屬團董徐佩瑗等密約蘇常等處賊目乘機內應並約各處民團會合夾攻此事至今何以未見舉動著馮子材等查明具奏日前明發解散脅從諭旨一道著鈔給閱看該提督等

卽刊刻謄黃向各村鎮廣爲張貼徧行曉諭儻有自拔來歸者卽分別遣散以孤賊勢而拯民生將此由五百里諭令知之○是月豁免直隸河南咸豐九年以前緩徵漕糧並民欠常漕倉穀雜項